

卷之二

月川類草卷之九

明進士第大中大夫廣西叅政前提督福建學政玉山夏浚著
欽差巡撫江西兼理軍務兵部右侍郎兼都察院右僉都御史滁上胡松編次

後學邑人程輝編輯

董良佐校正

書類

呈泉師

某久昧京塵恨不日飲新泉以洗此心然于紛華波蕩
之中冀見此體從吾所事亦頗得力但照躬不及即空
踈闕夫往往而是恐遂負教是懼舉人詹贊費懋樂南

去皆潔誠求進用敢通于門下

簡徐涿江學憲

涿江督學江右雖中遭讒沮人士至今仰之蓋涿江以名教自任氣節自勵崇雅黜浮翊正闢邪空同之後所僅見也故罪涿江者在此知涿江者在此今則清議共歸

聖明鑒格旋復量移以旌賜環此足爲吾道世道慶匪直相知之私慰也僕試吏茲土海民難治加以戎衛襟處雖或稍安其拙而猶未得行其志也故人何以處我

簡周崦山

去春入京具聞太倉之謫謫不謫在况不足論要之此疏不可無在

聖明則此謫不宜有耳然抑亦有數邪况不出陽明之門當無依託之嫌乃竟犯時諱謂非數不可然太倉視鑿烟瘴鄉遠甚謂非

聖明在上亦不可况達義命且泰然于此知道君子肯以一節自足哉並海瞻望非遙先此馳問鄭澹泉贈言并往

簡桂洲學士

在京辱知己之愛感德莫忘暮春至海上海民難治武

衛爭長且海防鹽政一二事宜關係頗大無由請教近見邸報知更定

郊議深契宸衷此禮樂百年之會明良千載之期也議者以輕改

祖制為疑然此固洪武初制且追復隆古之典破除末代之事正以不愆不忘之心成善繼善述之孝又何疑焉且復持論不激必盡僉謀以協公理但議禮古號聚訟彼此反覆不厭異同蓋學術識見人自有異吾皇竭誠事天勵志稽古定此無難所覲默啓聖心無言不容則不特萬年盛典可復而萬年命脉亦永

有賴矣知公心事可進此言伏惟留神省察

簡立須野司諫

承遠教深以當道薦剡未及為訝此須野悞愛不知其不肖也况資淺未應得此不敢不勉須野直道正色革弊懲貪致忤中貴然馮河包荒中行所尚若謂此宰相之事非臺諫所宜然而豪傑作用寧有窮乎唯須野采焉

簡江貞齋司成

昨公出嘉永南返棹而仙舟隨至却恨非圖南無因知伊川消息也承示大巡李公誤取深感知已地方一二

事宜將圖為民造福李之不終僕之無緣民之無祿也
使回附謝溥暑惟慎重孝履

答錢東圩太守

諸郎進士東海群龍先生濟世未究之功日可見其大
行矣昨得湘簞吏冗無福消受特奉供高卧北牕一枕
便到羲皇上矣
昔朱晦菴嘗言天下事湏人主自見得十分伶俐方可
成若有一兩分屬宰相便難又云宇宙間有極大兩件
事二千年來無人整理蓋謂郊廟之禮當復古典也我

公躬逢

明主復此曠典豈非千古之快事善馬周雲蒸龍變明興
以來蹇夏東里之後未有所會近縉紳言公開誠布公
翊正抑邪有古大臣風此相業根本願終休德卓然為
中興名臣俾信產從此甲天下豈不盛哉某試吏朞月
未有所成自考惟海民漸相信武衛漸相忘期盡此心
未酬此志我公何以詔之伏惟寶愛以承當宁眷倚

簡胡仰齋海寧

己丑孟冬僕赴東海之役時兄立朝才數十日遂出謹
言忠惋懇惻意

聖明必嘉納焉途中乃知攸陽之

命甚駭豈黨護之嫌抑未信之故邪然甫謫遽遷未為不
遇海寧借寇拙牧得師天假機緣未足為憾海上有澹
臺者許台仲其人也得賢問俗東海將不絃歌乎此僕
日夜究心而未之逮今得兄左提右挈辟涉此海登于
彼岸不難矣深望深望特遣小吏問候惟照亮

簡鄭澹泉

革除海漕二編我明缺典澹泉能成之極是快事革除
事核例嚴其言南北兵蓋不得已若周鄭交惡云者請
易南兵為京兵何如中有一兩處與平日所聞稍殊澹

泉必自有說海道經近得山東新刻并往以備參考中
間運道雖三易然皆從平江劉家港入無異路也

簡徐豐厓

日讀志稿辭嚴義正簡而盡詳而不俚可傳必矣中有
一二字義商量特用票出再留神一過無憾矣不避僭
妄以豐厓虛已誘之使言耳免耗分蕩一節已纂定思
仲橋增入半路橋下即舊繆家堰橋也更名之義見記
記不必錄但彙括數語便了

載閱志稿足稱信史更復何言豐厓必欲言之無已故
不免求之太刻如叙海塘愚以須總挈綱領分繫事目

乃見歷代施工顛末特擬呈教餘一二字義亦復拈出
再試敲推便懸千金莫與易之矣免耗分蕩二議一事
畧總裁之如此統惟詳之

封贈親以子貴推恩之典也故以附選舉非選舉而實
出於選舉也法未有書母統子父也公欲併書義起也
書其所知所不知者缺之可也孝民不附人物難以人
物例且不以先選舉也貴貴之義也孝節隱逸得入賢
賢之義也近武功志類此願更定之于寶壘母事奇而
恠恠則削之方技附襟志外之之意置之人物則失倫
恐非謹嚴之體須更圖之

簡詹少華司諫

遠承教翰知詔許侍養北堂萱花彩服一笑一歌足為
娛親之助况佳兒勿藥旦夕承歡此人間真樂三公不
易第懷才未用能不為斯人惻邪江湖廊廟君子豈一
日忘哉靜觀之餘徐起以了天下之事未晚也我不才
人繫身海角瞻雲之際恨不即從少華于山中耳不知
高卧濃睡之餘亦念及我簿書奔走之勞否也餘惟自
愛

簡葛子東

近代名臣若余子俊之功陳師召之行張汝弼之節真

不可少即靜菴之介亦豈易得乃若陽明先生則命世
大儒絕代豪傑昨錄未及豈據星宿而遺義娥哉先生
之不朽固自有在莫如姑避時禁以俟論定耳如墓上
之文泉師且為閣筆豈無深意若靜菴固亦當諱者耳

簡周草岡

敝邑建坊揆及扁額幾處思得草岡如椽之筆大書之
其廳事曰具瞻堂言民具爾瞻也後廳曰父母師師言
其職也縣門坊曰親民統言其道也譙樓之背曰海濶
天高見保民之氣象也學左為聖域右為賢閣期多士
以坐進此道也雙節坊表張氏二妾也二妾者何鄉賢

張寧方洲氏二妾寒香晚翠也方洲遺命正室妾年少
當遣之二妾乃剪髮見志寒暄孤棲窮年相守家人鮮
見其面方洲四海空囊身後家元四落二妾茹荼食檠苦
節益堅有司特請表之樹世坊也此其大畧也幸即携
筆增我海上大觀

請方伯吳南溪公鄉飲帖

鄉飲酒禮國家尚齒貴德彰善瘴惡讀法講禮甚盛典
也惟茲月正既望適維其期恭惟致政大方伯吳南溪
老先生盛德高年完名全節允矣嘉賓我民是則至期
請過學宮特正賓位以光盛典某等不勝願望之至

呈泉師

比入覲禁嚴不能繼見門下至海隅又不能時上起居
錢采之寄賜先祖列傳潛德耄光託以不朽世之子孫
不能忘也重刻二業通成呈覽此方學者多知後事先
生之教近復刻陽明先生敷奏錄將使世人識真儒實
用非偶然者併徃某試吏三年民頗信之然吾斯之未
能信而民信之邪文局勢格不能如吾志者多矣是皆
涵養未至充拓不去若古人則新法已志不妨並行其
作用何如縣志呈教伏惟尊照

簡邵玉泉水部

已丑長安逆旅偶得識荆辛卯覲行自淮走陸咫尺清
口未遂從賢茲聞浮槎夾石瞻望非遙辱以札先并惠
漕志無任愧感漕志佳甚具見經畧昔有元山今有玉
泉和溝自真州達淮古人豬畜洩減極有深意近清口
屢淤議者擬於口西別穿月港以避漲入玉泉目擊心
寄定以為何如元山前志述海運處與瓊臺見頗不合
然思元季至從張賊乞米坐困待斃何妨閒暇講求山
東新刻海道經具述海道甚悉淮口去平江非遠海人
必有習知者玉泉亦嘗物色之否使還附謝漫及

上桂洲宗伯

入覲禁嚴不敢繼見嗣後又不敢通書政府恭惟明公
以大公至正之心為格天究時之業

聖眷益隆士心益附愚意竊謂公與羅翁二老皆受主上
不世知遇所宜推誠交懽共圖報主以酬千載之逢以
暢和心以銷黨隙斯宗社蒼生之福夫廉頗相如列國
之佐猶相避遜以先國家之意况二公為命世豪乎狂
言惟公納焉某試吏三年于茲矣雖民稍安其拙而文
格勢禁志無所成古人一命能造數世之福其作用豈
易言哉新成縣志呈教克有之去公必憐才若魏水洲
則又寬甚矣明典黜幽賢者罹之柰何溽暑惟寶爰以

副中外之望

簡許九杞

比得邸報見劉梅公屬疏欲起九杞山人以慰蒼生之
望想山人亦不能無蒼生之念第不知當道推轂者寔
能來天下之賢否也某無似誤辱召命恐負明時惟君
子教之外撰先祖妣孝節行實敬上門下敢求一言以
垂不朽尚當躡紫雲之麓稽首以謝

簡汪南泉

吾兄之屈聞報殊不信既知有云云者誠可痛哭公道
何在人心之天理何在不可言不忍言不敢言也惟兄

曠度能弗動心獨不為天下惜乎人才惜乎天定論定
又安知今日之屈不為他日之伸手匪才辱召命又何
能為冀得閒散一職庶保寡過耳會晤未期惟慎重孝
履是祝

簡董晴谿海鹽

海人至自京承枉雲翰倦問舊令之政足占君子所
養嘉興黃子嘉善徐子道盛德甚悉既為民慶又自慶
也海民謗魚鹽之利訟牒為多田賦四十九科官民則
混昔周文襄平米法施之于今則不悉矣海患可虞塘
工未保區區俱嘗建議未有成功今得執事大才了此

無難也竄民革耗分蕩此則頗無遺憾初慮武衛爭長
然而平心處事與物無競亦自帖服其隙在分彼此耳
此中士風優于民俗以請託為耻獨勝浙西許九杞鄭
澹泉兩賢海上澹臺也西華吏才甚難得詩社有勾谿
東鑑西村朱朴方外石門月泉皆東海異人也董從吾
道人陽明老友此其最高者執事留神非徒得友且可
問俗諸生有志者甚多一時二三僚友皆可共事僕至
海時見山老嘗教之曰吾輩每厭作縣豈知廟食百世
名傳循吏顧在此不德深負此言今以祝公瀆行留此
尚俟嗣音

簡董晴谿海鹽

僕自量才非用世備負祠職亦也為之小者耳膏車到海想在冬暮此時春滿江城吾民有父母懷矣大同叛卒殺將事亦有激朝廷命將出師本以吊民伐罪而當事者倡為攻城之計意在貪功反致圍城為賊所脇復招北虜以抗王師事勢可虞官舫人回附此不盡

簡唐鷲峰憲副

西水之別又是隔年去秋承寄教章足見仕優之學一點靈心超然獨覓見之行事必大可規健美僕自量才非用世從事祠職俎豆之事亦也為之時事局面

今更不同青天白日黑風盲雨莫知其端大同兵變命將出師本意吊民伐罪當事者力主洗城之說遂致闔城拒敵事久變生幾不可測久之乃知

朝廷好生始就安撫然征之而威愈褻撫之而恩益玩至今猶未有善後之計耳奈何奈何使中附問惟自愛

呈久翁

其不佞雖素慕公然未能知公迨獲事公始信親炙之有益也及得所撰諸葛公傳讀之知公以豪傑之志聖賢之學為今諸葛所謂見大意者非邪比大同變作國是未定公獨觀事情始終謂一時貪忿之兵為非計擬

理爭之曾不顧其身家此何心哉卒之上契

淵衷適中機宜命公此行實出天意公亦豈能逆覩哉故嘗謂公此行實開國家諸鎮數百年安危非獨忍一方目前之事而已蓋

聖主好生之德與明公體國之心至誠感神以故承事諸臣得行所便亂賊之黨勇于悔禍罪人既得國法亦正不可謂無其故也然難解而亂未已處分未明議論未協人心未安生理未復故

朝廷必假公以行公必諭劄以往先之以平事諸臣亟奪奸帥兵權皆所謂先幾之先得者也愚固知大同之人

見父母以號控聽德音而感泣矣曉諭之文本誠意所發直推事因以求其心以洗滌其疑以切責其罪惻怛懇到使大同之人自叙不能如此諄切伏讀細思當痛哭流涕追悔前非不能自己雖有孟獲之徒亦殺之不怨矣賞而不殺當思死報

朝廷矣至謂此輩原無背叛之心非但恩德难忘直是理勢不可反復揆度皆究禍福利害之極畧無一毫掉闔欺罔之意明示不疑更復何疑攻心之要誠無出此夫天下之事操得其要然後可從而理今公規模素定得其要矣凡關攻心急務若賑濟查勘自各有道恩孚議

法立知恩上不廢朝廷紀綱下允合人心所安皆舉之矣若夫思患豫防為

國永圖雖事體重大未易遽言但以公體國之誠每懷靡及之念篤實淵深之思當無不獲况明良一德豈憂其不濟耶某昔於陽明先生平南之後以為足徵真儒實學今于明公有望焉俾天下知為今日真諸葛則吾道不與有光與人便冒昧陳此伏冀自愛以副當宁中外之望

復醴陵方尹

承諭表章名宦鄉賢以端風教甚盛德也辱咨及老父

在昔治行此在醴陵父老子弟某何敢言顧前有美而不知知而不傳非仁也某少從宦遊得竊聞之敢自陷于不仁以孤盛德哉用是不避稍列其事以復于執事執事舉以問醴之父老子弟當有能言之者矣語在行狀

簡初亭程公

其東海之後癸巳召還嘗再附諸子者問候未能專致遼陽土風久當服習天壤之間莫非吾土昨奉手教訊來使知君子敦仁若有終焉之樂况動心忍性增益所能豈必非福地邪惟天純佑賜環有期瓊海坡翁歸來

未老前此有信大義者未逢其適先生亦需之而已矣
不佞再脩祠宮亦也為之小無足請教迎來司事大難
行圖歸省矣近題福附覽此時事差強人意者第未測
所終耳伴還附啓草草伏惟順時實喜以慰時望

簡尹怕溪太守

久不問起居懼瀆也使來遠承教既媿感媿感仰惟德
政大成譽望日茂愷悌君子民之攸暨幸荷幸荷某近
况粗遣推是迎來司事煩難天涯白雲更關心目早晚
為歸省計耳老父在家承時存問雖長者優老則然非
不肖所敢承也使還附謝惟實愛以膺殊擢

呈泉師

某違教日久無任瞻慕自東海召還再脩祠署然當明
良之會禮樂之期曾不能少效其願學之志寔孤至教
邇來司事煩難兼之天涯老親白雲在念行圖歸省冀
得取道南都再登新泉之堂吟風弄月以去仰惟天命
純佑道體萬福向來引年之請雖至誠懇切而
當宁拳拳眷苗殆天有意于斯人也南吏之命固根本重
地銓衡重寄得老先生暫為之亦足以轉移士風扶持
世道非少補也近從友人得春秋正傳讀之真是見得
從來孔子修史寔錄之意與其竊取之義足破數千載

穿鑿附會之說明道之功于是為大教日又得古易經
傳測雖未終編已見易大意與教聖作用處矣斯文之
幸將不在茲乎某雖不敏願卒業焉前月林巡檢至又
承頌教西使錄三復之餘宛如忝前倚衡也林勾當已
完茲呂汝德南還之便謹赴上起居惟寶愛以棟斯文
不宣

代勾齊大夫辭鄉飲

老朽無德以風鄉閭敢辱賓筵况有內子之喪既非其
人又非其時也敢辭惟鑒亮

簡邑侯陸晉川

郵報中得見張西洲公論處分安南職貢事宜無事于
兵極得要領與洪武中誠意公所見畧同真不易之論
非時輩所及第恐

朝廷主先入之言

勅使既遣

成命未易回耳不知本兵作何題覆

先朝嘗有開此釁者朝議已定亟索永樂中兵馬數時東
山劉公大夏式齊陸公容並為職方式齊力言其不可
東山直取故牘焚之議得竟罷能今更得有斯人乎科中
薦舉疏亦見一時公議中間莫無夾帶否伏讀

勅旨真是物無遁情也擬即日走謝承命姑再積誠

簡楊原山選部

客歲初冬發潞河晝夜兼程而南至廬即次再越月乃
得襄事所恨老母不得一訣終天之慟浮名何物誤人
至此所賴老父差強健朝夕承顏小這不孝之罪豚兒
年十二初習章句讀禮餘稍為訓解此便今日山中事
業也入春得邸報知兄銓曹之命夫人臣效忠莫大乎
以人兄有知人之鑑本之以好善之誠此君子道長之
慶也在昔黃定軒為文選者七年乃開門延客人不敢
干以私謝方石為作像贊謂見其喜則知君子之得進

見其憂則知小人之不得退蓋以其憂喜占君子小人
之進退為能不負其職如此吾兄器識足追前輩請以
相期桂翁近况何如承賜老母墓文章故不孝感謝之
意公以身任天下之重所願愛身以報

主餘則公所優為兄為知己當有進于此者矣

上桂翁閣老

某客歲奔喪南還再越月乃克襄事伏承遠賜墓文適
當其期不孝藉是以為慈懿不朽計感激非可言謝山

中伏聞

皇子誕生中夜起舞實

宗社生靈無疆之休老先生愛

主憂國之誠至是慰矣見邸報知

朝廷將有交南之後此

國家安危大計老先生謀之必悉成化中嘗有獻此策者
東山刘公大夏式齋陸公容並為職方力為尚書余公
子俊言其不可狀事竟得寢况今莫登庸自分筮逆直
欲求貢不敢非敢貢固不貢若惟遣使問故待其歸命
朝廷從而處之不煩于兵惟老先生熟圖之無失
大朝之体以永緩東南之民實相業第一義也便風附謝
及之伏惟鑒察

簡夏東巖太僕

某不佞然於先生有道久切嚮往滁陽傾蓋雖半日春
風至今猶有舞雩之想遭變歸來憂病中未遂馳候乃
辱翰教深慰瞻仰又承道体多福寔天寿平格以棟斯
文也尚擬積誠以領終教君平之債乃勞長者注念讀
札中未能決此姑圖另復評還先附謝

呈桂翁閣老

某不孝積累延祔兩年內失政恃怙僅忍死襄事耳完
憂不敢通書政府中夜瞻望台階惟公以明良魚水之
欢处平章密勿之地朝夕輔德視向來委任權力今得

畢行所學以盡致
主之忠至於敷求賢德豫養國本計尤切老臣之念我明
中興宗功當不使塞夏東里專美于前令壻以容真副
乘龍之選足徵知人之明以容國器未論門楣也久崩
服闋未起此老才足相佐誼可久要以人事君惟明公
圖之不肖孤誤辱知教罪逆餘生尅責無及時尋旧業
思補其過惟明公終教之廬次奉疏不次伏惟台照

呈泉師

某違教日久無任瞻慕仰惟天命純佑道体多福雖久
塵引年之請而

眷命方隆留都重地當此考績之期得老先生持衡以公
黜陟之典足以端士習翊世道非小補也比聞有言及
書院者此固學術不明之故然安知今日之相詆不為
後日之相信邪老先生以道自任不求天下之必信已
又忍于以善服人哉况斯文所恃有不在此者乎某積
累荐蒙酷罰禍延先考不肖深惧不足以當大事謹用
述其遺行上于門下伏丐俯垂哀憐特賜一言以表其
墓以示我後人不肖孤將思世世守之狀別具伏惟尊

照

啓介翁宗伯

某以鄉後進辱明公厚遇至忘勢分未能報德不孝遭
先母之喪又枉臨奠弔慰憐哀感益深詎意酷罰未
歎禍延先考惟忍死襄事而已宅憂山中久稽裁謝仰
惟正位秩宗當此明良之會禮樂之期得我明公殿之
以集其成甚盛甚盛惟是務煩事難不免軫勞計慮耳
前遣家人告換勘合謹此奉候惟實愛以副當宁眷命

與魯節

久不見子翰令人懷想聞暮春有天真之遊劇喜劇喜
吾子以開也未能自信之志尋吾典點也之樂坐進此
道不難也努力此行他日吟風弄月以歸予當開月川

草堂待子共証心印以忘吾憂也努力此行

簡李克齋

辱教甚慰馳繫傳聞平郡治甬道郭墓郭墓見山經地
志非一誠未易信若季武子許杜氏合寢階之壘固非
禮然此世遠無主可遷或夷其封亭戒石于其上似亦
兩不相妨且志又云設此以當前衝雖存之可也常山
有女醫史鑑氏者世其業近病者數招之奪于夫甲竟
不能行夫史挾活人之技縛于一役用違其長與豪傑
不得展者何異敢仗左右一召之來使病者以起未必
非仁政濟人之一端也况此役在常山今則上下俱困

宜有變通以宜民也僕非尋常說客一咲
不答陳太鶴掌教

承示禮諱理明詞愷足見君子愛禮愛人之至百里風
化萬代綱常甚賴甚賴君子不奪人之喪亦不可奪喪
也况國哀天下之通喪乎尊不可以奪卑卑得以奪尊
乎此禮之不講而明者也惟禮有制邑侯北來前此閱
服自宜即吉不敢過也邑僚方斬然斃二自宜終制不
敢不及也不敢過禮也不敢不及亦禮也道並行而不
相悖者也高誼侯嘉納可以教吾民矣章二具復容面
既

簡李克齋

得六月報乃知約齋兄言事被謫不悉其詳想諫南巡
也可謂無負其職矣謫不足言也原山落職美才可惜
久處事叔不早自引今何及矣宦海波何處是岸江
湖醒眼不足動心君子亦惟盡其在我者而已此報未
見須煩再示冷塘勘官作何處分有聞幸并及

簡李克齋兵憲

別久僅得朝正之會而禁嚴情隔殊失款洽數年濶懷
又付之東流矣東海兵憲之命未論超遷然當海濱多
事安攘之寄須得才畧如兄庶望善後吾鄉先達周文

襄有功德于吳廟食百世兄能經畧東海禦敵捍患上
繼文襄之績無難也弟惟舊德之食勉終事君之義而
未之逮自遭子喪百念俱廢鬱久居此非其志也茲
鎮海衛經歷陳鎮便寓此鎮玉山人淳篤有行得事明
公是其幸也餘惟自愛以策茂烈

簡郝石梁兵憲

久別無任瞻企吾兄總憲閩南兼秉戎鉞實一方軍民
休戚所繫駐劄建寧又得武夷山水之勝折衝尊俎不
妨作太平吉甫也弟起復之出勉終事君之義近當宗
廟之變極疏省修事宜所賴

聖明聽納敬天責己勤政憂民是又轉禍為福萬年命脉
所繫也疏稿代東建寧通判葉祺僕同年半生老友也
素有志行茲幸得事君子願進而教之即所以教僕也
冗不盡欲言惟實愛以膺寵命

簡胡柏泉學憲

別久無任傾企昨得晉陽來教示學規足慰馳念具
見吾兄欲立欲達之心不厭不倦雍州自古多賢哲今
得名德以主教事吾道其有賴乎遊武當山記妙甚讀
之如登武當矣點掇情景如畫絕類子長固兄學力所
到抑亦得名山助邪健羨弟勉強起復求終事君

之義自遭子喪懷抱作惡况值時大難處此殊非其志
昨廟災題疏具言修省事宜伏蒙

主上嘉納亦轉移一大机会而言者紛々遂爾壅隔是又
關係非細 廟建一疏則具言天時人事宜有所待幸
賴允俞此則差彊人意者稿附覽冗中致此殊不悉

簡黃北山大尹

濱行冗敘失禮至今耿耿下車想在初秋冀此時江邑
之民已在慈母懷矣所謂鷹鷂鷹鳳云者猶二之也若
世重世輕義刑義殺只一道耳愷悌君子誠心求之豈
憂其不中哉便風附此惟自愛以慰民望

簡郭淺齋都憲

某去秋道濟過辱教愛迄今不能忘漕役奏功歲運克
濟仰見賢勞足副

簡命且當時勢所難非有真幹應變之畧其孰能與于此
然河變無常恐終難賴導泉開湖建閘之說實為漕計
根本在今日所當熟講而豫為之所者蓋漕自濟南達
于二洪弘治以前原不資河而東水自足誠使導泉以
濟其源開湖以廣其瀦增閘以節其流則亦豈憂其不
濟哉况人力可憑河患無慮此實理漕長策也昔久菴
公建白漕議言之甚悉錄以備采唯明公留神為

國家建此百年之業以續恭襄之績實愚之所深願也
伴還附此申謝外疏稿請教

復曾石塘都憲

吾兄今日撫綏東土適北虜猖獗山西失事中原多故
之秋豪傑具經濟之畧翊

國救民正此時也前所上防虜五事具見安攘至計而明
賞罰請便宜二者尤為得其机要雖

廷議未盡允行願在兄有得專之而可以豫為之所者願
竭力為之必有所濟擒獲奸細足以伐謀昔者已已之
變也先固嘗款據臨清以扼我咽喉所賴于肅愍公選

將築城先事防禦而虜遂復謀今日中原保障寔在兄
矣北虜方意輕中國將來大舉長驅勢所不免承平久
而武備衰議論多而成功少恐遂墮宋人削弱不振之
患奈何栢泉兄上言邊事亦根極要領雖畧見施行願
所以處栢泉者未宜恐難自效適足以沮言路耳伴還
草草復教惟兄自愛以副海內豪傑之望外儀注附覽
第欲求不甚得罪于礼而罪固有不可追者矣

簡唐濟軒太守

湖中別來忽復十年第宅憂山居者半惟兄典守輔郡
適當邊隅有警兄能和民畜衆修其武備寔為關輔保

障河間復得甌東兄為之足繫時望方今防虜議論徒多乃若兄輩可直見之行事豪傑自效正此時也弟以薄劣承祠曹多事欲求無甚得罪于禮顧亦難矣疏稿二首錄去請教外帖附上乃敝僚霖原黃子為其叔氏贊皇學諭思從君而有所請者霖原子清才雅望弟素重之其言當不誣君子作人寒氈老生必在陽和發育之中豈復有不獲之嘆邪霖原子嫌于未同求通于弟亦惟兄亮之

簡曹石塘都憲

使至再辱教答甚慰比陳增築臨清外城事宜區畫計

料公私不用繭絲保障古病相妨在公則優為之豪傑作用自是不同如此所司猶未議覆要之不能不從也正月虜寇蘭州古人防秋蘭州又自來虜所不到之地是今日備禦之策無時無處可懈弛也三閔近用將領頗號得人翟聯峯方代宣大之任當此之時雖大英雄未易自效觀前日樊老所陳真是大壞極弊恨不蚤以實聞向來捷音徒自誑耳嗟何及哉今日須是委之重叔假以便宜庶幾有濟否則愚不知其所終矣使旋附此惟實愛以副時望

答胡栢泉參知

使至領翰教知軍門起居多福兵政紆等朝夕弗懈當
此疆圉多事正豪傑宣力報

主之秋也近報吉囊之死固有以為慶者然在我安危大
計豈係一商之存亡哉不自恃而恃人老成遠慮當不
如此近革去宣大總督責諸邊撫臣第恐事無專制
不免自分彼此或致掣肘耳吾兄今日自效凡所得為
者亦勉力為之而已出塞行邊諸作足為一時詩史使
旋草草復此暑中塞上萬惟崇護以慰時望

簡項既東太守

別復隔歲使至承翰教甚慰馳企河間輔郡要衝得暫

借寇必有遺愛于人古人謂有脚陽春喻仁人之澤博
也過客供給勢所不免吾兄但存節愛之心亦有並行
不悖者矣何如何如第守此如昨莫可自效者人還草

草附謝

答鄭澹泉司功

昨承文教具見吾兄明理之學經世之才邈焉寡儔嘉
靖名臣頌皇明異姓諸侯傳叙志在春秋文同班馬頌
極精當能將許大識見表裏一時人物不獨為諸公傳
神即

累朝實錄在此矣傳叙極有法則述

本朝事能如此委曲嚴切雖前人所難敬服尚當筮
日積誠請卒業焉經傳說深見古人釋經不敢自信之
意爾雅為子夏詩傳但訓詁其字令人自得亦此義也
後儒反以訓詁為淺章句為詳失之遠矣考正易傳語
最明白今翼中如彖曰象曰本是彖傳象傳遂誤以為
彖為象耳易林世傳出焦延壽亦相沿之失延壽既非
成元間人易林安得豫言成哀時事據理斷之其謬安
無疑矣說陰厭陽厭真得古人制禮精義笙詩有絳有
聲方是歌詠聲依律和之音凡此皆兄學力所到實見
得處不朽之業也力疾口占用志謝教之誠尚思而究

其蘊

答翁一水主政

久仰未遂親教殊切嚮往北虜深入真如蹈荒原也可
憤可憤此時諸路調兵且集大原當可救獲江在平陽
當有備恐東奔榆次澤潞間未知能堵截否此賊今分
道入寇又未知猶有大衆在近邊否彼既深入貪利使
諸將果能誓心戮力堅壁清野則進無所掠或擾其不
意擊其惰歸則帝王之師豈出犬羊之下執事守井陘
之隘任督餉之責其所倚賴非少疆圉多壘正豪傑自
效之秋惟努力以襄武畧是望甚以菲才叨司大方文

事深懼弗堪得承君子之教幸矣敢辱嘉貺不腆幣儀
因使納上用展謝忱

答陸晉川侍御

使至拜手翰足感遠存且得憲節啓處之詳為慰江防
大計今得明公經畧實方隅之慶給印事已與儀曹言
之矣近傳虜從大原北歸尚未見出關報耳蓋初意窺
平陽平陽有備不得入故復從大原趣北深入輕出真
若蹈荒原者不有平陽之守其禍不知所極看來今日
急務只在用人一聶雙江能捍敵萬強虜不得犯境使
山西列郡盡得若而人焉寧憂虜患邪其誤承視學閩

海之命大懼弗勝公何以處我

間吳南溪徐豐厓徐東濱鍾西阜錢東圩諸公

遺教既久仰德殊切嘗從澹泉泮泉峽東諸君處備承
諸公福履一時海上耆英不減洛社之盛表正士風尤
是道行之實某承乏閩南董學之後深懼弗德無以帥
先多士相知何以教我茲道出西水頗思乘風海上見
君子而未之能謹疏馳候竚目海雲瞻恋莫宣

啓介翁閣老

某不敏幸以職事得事明公誤受特達之知推心置腹
與之為善此某中心戴德不能忘者也迨承閩南之後

又辱餞贈頻煩重之詩教至情厚德有加無已承荷弗
堪感激彌極次抗恭聞特進師相之命一以維心置
明主為天下得人賢于人情夢卜明公平生許

國之誠當益自信一念報

主之忠當益自靖一德既孚輿情自協赤鳥几几當不動
以浮言也惟是政本至重邊事大難願公為宗社生靈
留神焉此今日相業第一義也茲得侍御何邦美便謹
疏恭上起居伏惟自愛以承休命以慰民望不宣

謝邨東廓先生

四月念五日得王師現寄惠先墓銘文并拜教言不惟

先德託以不朽而詔其以顯揚之孝大道之要者亦云
至矣其雖不敏敢不請事以求無負於有道無辱於斯
文別具詩教具見窩中真樂觸手經綸山中相業與安
富尊榮不世之勲等耳何時得親光霽以見與點氣象
師現人便謹此附謝波石適行縣寄物容轉致諸惟日
崇盛德以慰道望

答虞東崖軍門

比祭戟初臨玉山荷蒙枉顧衡茅畧去勢分錫之幣儀
承荷弗堪感服無任自入閩來試事倥傯未遑陳謝罪
負可言恭惟處臺節制匹休前哲德威並著方隅救寧

武功用襄文事益振凡在官聯曷勝慶忭茲百戶陶勝
公差之便謹疏附上起居伏惟台炤不宣

簡鄭澹泉選部

近得兄輩去國報宦海風波乃爾然而不得其職則去
亦君子守職之常耳吾兄以名節直道自勵用此以繼
湛泉之後是欲以鐵船石帆直濟苦海雖長年三老之
不動心而惡風吹沙能使不墮落否古有守正通變處
難而不失其常度者非真正豪傑不足辨此惟兄圖之
弟以寡德濫竽文教雖願得士心然愚竊自信尤恐忤
人亦惟自求其不負此學而已風便奉問惟寶愛以副

時望

復張龍湖少宰

某不佞然于當代名德如我公者寔切向往銓衡地重
寔掌邦治我公知人之鑑體

國之誠足以上佐

明皇中與嘉靖前輩若端毅端肅之業不足多也某弗德
濫竽一方文事深懼無以帥先多士有負任使昨兩洲
公書來承諭福清鄉賢黃教授者此君昔在長沙時先
人為醴陵令最相知好某雖在童年至今猶記憶之公
不忘其知遇固盛德事乃若黃君亦真有古人風也二

子學行俱可所惜年力旣愆試竟弗售諸孫仁伯仁儉者可進已養之郡庠矣仁人之後其必有昌乎便風謹疏奉候餘惟寶愛以副眷注以慰中外豪傑之望不宣

答詹少華司諫

某以涼德創割之餘晚有弱息過承長者垂念足感通家至愛賢即學已有造不自滿足又欲為擇良師友與處何患其不大成也聞中士人好學甘貧無如莆中舉業尤其所長昨得越以聞者文有奇氣行亦清謹足以應公之選考卷附覽隨檄行取至日遣之先此奉復

答王遵巖參知

諸生至遠塵手教足感念存我公海內名流斯文先覺古人謂其子弟從之厥功亦與安富尊榮者等爾在公今日山中事業亦何讓于立朝所建立哉僕自愧學未有聞其何以能自遂其欲立欲達之誠邪亦冀有道者有以振之耳山東叙齒錄文具見開來大意即就齒讓之說廣之以當仁不讓之義而復道古禹顏以命之所謂上乘第一義者非邪僕亦受教多矣諸生所請俟思所以處之章三具復不盡

簡劉岡梧司封

側聞北上有期當此銓曹多事必得豪傑如吾兄者足

以辨此澹泉元資勞已久超遷非遠昨引用禮曹路廊
菴黃霖原于要路皆僕所敬服信得人矣傳以巖尤負
時名更得許石城諸公相與協心實君子道長之慶李
抑齋元雖受屈公論未泯君子亦惟盡其在我者而已
矣昔人言宋璟守正姚崇通變欲行于今之世其惟兼
斯二者乎吾元具正大之體妙圓神之用又何憂其不
濟哉此海內豪傑所倚望者願留神焉

簡葉少巖司諫

近得邸報知擢職諫垣足為君子道行之慶蓋諫官行
其言言行而道亦行矣故自來論諫官與宰相異位而

同功况相業又根本於此吾信前哲固有其人今當屬
之名賢矣今之患進言之難者蓋多犯未信之疑所謂
勿欺云者亦惟先務積誠焉爾君子致主有術一時名
臣不足多也令第春元聯芳濟美尤難得者僕不敏與
有風教之責殊無作人之效深懼深懼巾石兄便謹此
奉賀惟慎重天下之寶

答顧願齋學憲

遠承手教深慰瞻跂近得邸報知

廟建又復祖中制蓋

七廟雖則古禮然惟可行于嗣王而不可行于及王今

聖明本萃聚之義觀會通之原斯禮不難定矣我夫素抱
經世之畧想當再出以副時望便風附謝不盡

簡劉罔梧司封

澹泉兄之謫不但直道難行之故蓋當湛泉之後風波
未平而鈍軒之轉不免太驟犯嫌觸忌亦勢則然耳君
子用世須在調停否則兩敗無益此兄世故甚熟直是
過於擔當反使後人更難措手然若二兄建立風采亦
足暴于世矣又何怨尤之有願兄留神以為善類後日
之地慎勿輕於一試也臨風無任懇切

簡郝石梁兵憲

過建辱厚情次興田得印報不肖濫竽學政每念古人
云學然後知不足教然後知困不足且困每懷靡及人
言寔獲我心不徒善攻其短也惟是外邊毀譽得失頗
能覷破却覺平生自信處稍能得力餘不足論也具白
當道兩袖清風即日出閔矣濟時須是豪傑也良晤未
期瞻戀莫宣

啓介翁閣老

承惠教札讀得孫詩知慶源裕後之祥讀恩錫堂樓名

額記知

帝眷忠弼之隆乃若忠之一言罔明公致

主之誠而弼直之義寔帝舜命禹之旨真所謂平生一字符者此又近代輔臣故事所未有也甚盛甚盛某不佞誤辱明公知遇所愧身名未立謗毀是滋徒累知人之明不知何以自效自贖以求其不負也司直呂汝德便謹疏代申感謝之私

簡姜勿齋方伯

違教頗久無任傾仰聞人何幸得公保釐然清德重望如公者早晚當晉秉鈞軸一方不得久專也不毅徒以愚贛寡諧致塵人言分當退處山中從吾所好惟是新例聽調者必至部恐重得罪冀北上受命之餘徐圖引去以明出處之義耳用是顛人特領部咨敢告執事

復張合溪方伯

北辱手書并枉詩教仰見雅懷使來備承諭言此事苦心與公同之夫易著從一之義而律無再醮之文大都古聖立極教人以義而亦不絕人以所難能耳薄德遭此家難實天降割更復何言我公有祖之尊有母之親教之必盡其誠處之必有其道在僕義固有不得而與者惟公裁之則是臨盡哽塞不知所云

簡田豫陽學憲

久不奉候傾跂何限吾丈清才雅望海內所希乃不免

為時所忌不究所施其何以慰豪傑之望要之道有與
廢性無加損違人知命亦何怨尤之有君子之圖惟不
朽者固自有在山中日長著作日富稍暇當特造高廬
以請教益為快初至姑此問訊惟自愛

答孫未豐斗城

昨得家報荷書既遠及深愧先施之未能也執事清才
遠器試政百里民風吏治深有賴焉揚東里官至執政
而猶憾未得作縣蓋君子明德親民之功無有切於此
者惟自愛以慰民望以樹遠業至願

簡侯筆山兵憲

我公以雄豪磊犖之才勇於任事喜於建功雖中遭讒
沮而道無加損况象賢人平生未究之志有所託矣
而又何恨乎吏冗未能走侯乃塵手書先及墨妙並貺
宛然坐我雁蕩之間第引喻過隆菲薄難任拜教之辱
別諭地方事變當局者心事人固諒之在今須得調停
耳附謝章、不盡

簡程松谿司成

鄉過永康曾寓書奉問既而聞遭卜氏之戚雖則可吊
而抱孫之喜猶可藉以奉慰也大器晚成公家具故
事仁人之後必昌此固要諸天道可信者伏冀自愛以

棟斯文

簡戚南山都諫

其不佞一時名德如吾丈者久切嚮往雖自愧謏薄未能信於君子然其好善之誠服義之勇寔有不敢以自欺者比兩過椒山載造高廬冀請教言用圖善後乃辱傾心見示前擬洞釋一笑交懽千里嗣問雖君子與人為善無已之盛心則然殊非不穀所敢承也菲才待罪于此適丁多事曠徒海寇並時竊發飢饉師旅何能如古人作用彼歆自擇人所最難者以自效非有鐵漢瘡梁誰能辦此遠惟道履嘉祥極慰瞻跂偶過萬鹿園特

附謝悃未間惟自愛以副海內豪傑之望

啓介翁閣老

其不佞誤蒙明公特達之知所愧未有國士之報比者待命都下方惧吾斯之未能信何以取信于人而明公信之不疑古人謂鮑林知我謂能知其心也某何以能得此于公哉初蒞浙東適海洋有警師旅飢饉無仰由作用而顧欲以自效豈不難哉今賊勢幸稍平亦為民慶耳恭惟明公遭逢聖主平章事業中外倚毗近得邸報見申揀何御史一疏此實古名臣盛德事近代所未有也對揚

休命以服天下在此舉矣其盛甚盛三山林即中便謹此
附上起居伏惟順時宝爰以副眷注以慰中外之望不
宣

簡黃久庵宗伯

某不佞昔在南宮幸獲親炙有道與聞至教迺知真儒
實學與隨世功名外邊智教作用直是懸絕所憾未能
卒業門下以畢此志耳十數年來起復祠部出典閩學
期無得罪于名教所愧名實未加忌毀隨至古人誠定
之效邈不可得然亦惟求盡其在我者而已矣待罪于
此適丁海洋多事師旅飢饉無古人之才徒有其時而

歆期其效將何以自遂乎温台咫尺行當特走赤城敬
叩紫巖請教以從事草廬高卧天下思治龍德雖無隱
顯之殊然出處之關於世道者豈小小哉海內豪傑之
望何時而慰邪某記在教下敢有所請別具先人狀誌
上之門下敢丐一言用表墓道以圖不朽某亦死且不
朽某無任懇祈之至謹疏

上桂翁閣老

恭惟天命純佑

帝心忱恂俾明公再秉國鈞克終相業實
宗社無疆之休命使蚤臨風駕適往固中外延頸之均王謹

用差官奉候蒲輪某尚當執役躬迓浙水之上外新刻
資治通鑑一部計八十八冊奉上記室司馬公平生未
酬之志願明公留神焉某下情不勝屏營之至

答詹少華司諫

別來忽易寒溫道左雖不及通寒溫語然少華具瞻終
日如對菲才待罪于此海寇猖獗師旅饑饉無古人作
用而有其時所幸處兵克捷賊勢衰卻善後之計正費
處分未冀東隅之獲敢曰北門之寄邪國手旁觀拙工
顏汗柰何常山修城事業有定議久未報工故不得不
責成于當事者比已行府委官督理俟有回文即許之

草草奉復止齋集一部附覽

簡魯前川都諫

辱手書惓惓足感知已之愛吾文以真正英雄且猶未
究所施菲才如僕焉敢尤人惟守至正以待天命觀物
變以養學術稍覺此心不妄動耳吾文見道分明更覺
脫灑但海內豪傑之望方殷大才終當用世也別諭已
領故家人物隨其用之大小要皆足以自見便風附此
惟自愛以副特望

簡費屏石司務

冬曹司廳之選在吾兄素抱雖出俯就亦庶幾藉此為

豪傑起家之地耳菲才待罪于此適當海寇犯境師旅
饑饉何能辦此所賴處兵用命賊乃敗卻善後之計正
費處分挂翁再相中外倚毗人心世道寔繫重焉兄受
知己之愛能忘規倣之益乎蓋自來大臣當事未有不
賴名賢共相贊助者惟兄可以聞此言也便風附此惟
留神

啓黃久庵宗伯

比小吏還恭承手教腆儀不勝感服近

詔起用輔臣傳言以爲商度附

廟之議此事關係典禮綱常未知畢竟何如昨請先人墓

表伏蒙賜允不朽之託有在明春當親詣門下拜領海
洋賊情鄉來當事所處失宜鄙人愚見海寇勢異山賊
防遏則易追勦則難近日出海云云直同兒戲百年之
計果安在乎願聞長者之教以從事焉惟翁詔之幸甚

吊慰北原翁

老先生今日出處大節庶幾古大臣以道事君爲能不
負者矣雖回

天之心未能自遂而闢邪之力猶有耿光或疑揚伯修輦
反因危論相激復遭禁錮者此殆有數存焉豈公計慮
之所能逆覩哉君子亦惟見義則爲不啓黨禍則已若

夫君子道長道消實關氣運天若祚宋會見有天定時也又聞適丁太夫人憂雖大孝終身之慕在公今日移忠以廣孝者亦可以無憾矣錢塘江上邂逅令弟別駕歸舟謹此奉慰附上焚帛一束敬致太夫人几筵用申千里瓣香之敬伏惟節哀以襄大事

啓介翁閣老

伏覲邸報知重申

新命並進台階一德同升百年僅見此聖主調和之心裁成之道可謂希世之逢矣再覲謝啓有志同道合而相濟奮庸熙載而益光之語仰見明公素

秉共期交權以報

明主此寔

宗社無疆之休中外臣民之望也幸甚幸甚某待罪于此又復逾年山海之寇稍爾寧輯未能為地方造少福利為愧耳處郡傳倅便謹此奉候起居伏惟寶愛以答眷命以副時望不宣

啓黃久菴宗伯

此承教劄諭示海防機宜東南保障百年之計具在某雖不敏當奉以周旋雖中間有事體重大非遠臣所得專者然能體此意行之亦可以無過舉矣幸甚幸甚茲

去僂居曾不數舍徒以匏繫未遂親教政切瞻仰忽厯
遠使齎賜先人墓表開緘拜讀存歿激感不朽之託中
心之藏非言可宣備邊六事誠得中國禦戎萬全之策
固皆古人已行之成效又多

祖宗以來之成法

宗社至計無以易此昨於邸報中僅見款目今得備聞幸
甚幸甚冗中謹此附謝尚容額裁伏惟尊照不宣

簡姚虛谷方伯

慶元縣請建縣城中文代巡公云已行貴司議覆慶元
當兩省之交盜賊出沒必由之地前此巨寇竊發縣治

無城民幾不保所賴縣令陳澤處置得宜人能用命幸
成平寇之功然亦危矣今建築城之計誠為久安之圖
且綜理周密不侵於官不擾於民相應依擬望我公早
為查議乘本官在任可以了此已與蒲池公備言之惟
俟尊裁耳便風附啟伏惟尊照

簡蔡可泉學憲

遠教頗久懷德殊勤惟公學政誕敷賢勞茂著昔者虎
谷子有言進賢退不肖於朝廷之上而致天下治平之
盛者宰相之職也進賢退不肖於學校之中而立天下
治平之基者督學之職也某嘗待罪此官心愧此言惟

公以道自任以名教為責以樂育為心足以當此願留
神焉吾道世道尚有賴哉年家之光不足論也菲才居
此又復逾年未能為地方造少福利所幸海寇曠徒時
就寧輯耳適中致此近作數首并往屬暑試事方殷萬
惟自愛以副時望

簡東郭鄒夫

久闕修候心切仰德揚郡博至獲拜教劉重之雅什副
以清貺不任感服承道體多福朋來樂聚益明此學以
覺斯人比之安富尊榮之功不可加損甚盛甚盛某待
罪于此又復逾年雖海寇曠徒暫獲衰息未能為地方

建久安之策有負多矣安敢別有怨尤邪揚子志行嚮
進可嘉此中人士近來多不知學視前輩葉蘓劉章之
風貌不可得今得揚子稍作興之其有興乎便風謹此
奉候起居兼以為謝伏惟寶愛以揀斯文不宣

簡黃古溪司諫

執事以治行首選諫議足為言路之賀乏便未及展敬
兩承遠書足感念存近得邸報見舉論大臣出處大節
關係不小古人謂人才進退用舍之間實繫治道盛衰
之幾大賢作用真能識其大者甚盛甚盛所願經德矢
謨允執天下公議審幾持重以時發之固天下豪傑所

仰望也僕守此行將書滿慚無寸補所幸今年海上又得小捷賦勢從此衰卻第未能為地方建久安之策爾知己何以教之霖原兄銓部之擢實君子道長之慶將來舉措當必有大強人意者矣張白山便謹此奉問惟自愛以副時望以隆遠業

與陳太鶴

承教郡志目錄殊有古史法甚善甚善中間有一二凡例當商定者輒用括出如更天文為分野更地理為地輿者取志義所切也若建治殖貨人物藝文列傳括之以邦典而三才備矣外志更為雜志蓋如僊釋可以外

言災祥庶微不可以外言也大都今之作志者率取則于方輿後史分析益詳而史法益遠故今約之如此又如地輿志雖有形勝山川風俗諸目不必更作小志但以次書之義例自足人物列傳不必更設科但據事書之人品自見蓋叙事以類從而論人難以一事蓋也某知作海監志大畧做此併徃惟有道者裁之

簡周臯憲副

省城草三而別僕亦旋復東下海寇猖獗令人憤悶誠須遏挫其鋒使之大有懲創而去庶幾善後濟師之舉恨不即發第中間事勢有甚難者蓋處兵之強不在官

而在民前者調發皆鄉兵出於雇募亦甚費事敝道不得已查於扣留曠後民壯工食給之然亦無幾今所調兵即以二百人爲率爲費不貲况在途行糧亦必有處乃可除患若徒強之使行人不樂從豈能有功惟有雇募一節區區可任之果能不吝千金勇夫可得僕當精選且擇將領統之不敢不努力也事關安危敢吐肝膈惟明公裁焉

簡項甌東

使者至得奉翰教及紀行之篇雖不獲錢塘之會領益多矣古人得于山川之助者蓋亦各因其量公之斯遊

即謂之因以見道焉可也中間經歷有第平生足跡所未到者亦可以神遊之矣幸荷幸荷海寇之患雖歲或不免未有猖獗至此甚者其端正坐于海禁不通當事者處失其宜爾公言極中要領蓋海寇雖出沒于海而寄命于岸若通市舶而爲之約法則可制其命而坐享其利即不熟但絕其交通據其險隘亦可以不戰而退也若今之謂出海者直是兒戲第雖知之言之而不得專之處兵之遣寔救目前之策金盤之間今年獨免賊患其效亦畧可覩但借兵寔非久計業令溫郡每歲扣存民壯工銀伍百兩似亦足充雇募之費市舶之議未

行此固備禦在我可恃之一端也何如何如雲間糧儲
雖難理會以公經濟之才塞淵之心爲之何所不濟文
襄之績謹爲公望矣第奉職無狀書滿有期素志不酬
河清難俟亦安能鬱鬱久居此耶因風布悃臨楮增情
相見未間萬惟自愛

簡鄭澹泉

七月得朱玘之便曾附候啓想達記室留都之行定在
何時靜觀熟計君子出處之際必綽綽有餘裕矣近日
銓曹風波尤非昔比固亦自有以取之不可以常論也
某奉職魚狀書滿有期素志不酬河清難俟亦安能鬱

鬱久居此哉今年海寇尤劇金盤之間所賴處兵可用
賊不敢犯然亦支持目前之計非久安之策也大都海
寇可守而不可與戰可岸禦而不可水攻能據險以守
清野以待亦不戰而自退矣若市舶之政行則海寇之
患委之海賈我可坐制其命而享其利矣前浙巡視之
設今廣通海之故固事之有明效者矣高明以爲何如
便風致此相見未期惟寶愛以副時望

上桂翁閣老

夏月馮驛丞至備承台候萬福兼辱墨刻之教極慰瞻
仰三衢遇費屏石出示入京志感諸作堂二大雅當于

三百篇求之我公再相格天事業已素定于此矣甚盛
甚盛邇來縉紳皆言我公大道為公之心不與諸司之
事其愚竊以所謂不與者不以已與之而已若夫旁招
後人以盡以人事君之忠則固大臣報國第一義也公
豈得以忘情哉某恃公素知輒敢進其一得惟公留神
某奉職無狀書滿有期便道過家計明春北上領教門
下茲道出穀水得東崖廷尉之便謹此附上起居伏冀
倍萬室愛以副當宁中外之倚不宣

月川類草卷之十

書類

簡呂巾石翰學

高軒過此坐失嘉會即欲放舟相求病未能遂義命之
說講之習矣然有不能不耿于懷者如嗣親之託出
處之道是已修人事以聽於天現我生以聽於人如此
而已矣吾兄知我愛我何以教之南都之行想在春秋
如郡城之約不果當圖臨岐之會爾聞有泰山孔林之
遊此平生欠事紀行有作無惜見示別楮引候敬

簡施半峯僉憲

桐江之會又復隔歲懸仰殊切菲才重遭中傷命也何
尤盛德如公乃亦遭挫豈厭人心達人觀順之而已
高軒過此抱病未能走候為恨僕去年復遭殤折百念
俱冷惟出處之義未明不能無取于懷者耳公壯志
強年努力前征當益自信行路之難未足訝也臨風瞻
恋

答招梅村大尹

承示鷺峯公簡足感故人情厚僕才劣數奇更遭病苦
百念灰冷惟是出處之義未明尚思早晚勉強一出冀
受

命之後即為自靖之圖爾清時勲業須讓臯夔靜裏煙霞
願居巢許且髮白相催河清難俟非會逢其適維有大
英雄亦難自見草草奉謝雅愛不具

與呂中石庶子

信宿領教未慰契濶然得覽原心圖說如獲心印維頭
腦皆從圖書中來然非真能知心何能片片拈出如此
願卒成之以慰來學雨中未能候送實切瞻跂鄙人才
劣數奇義命已安惟出處未明耿耿于懷者未氓耳願
吾兄為我靜思而熟籌之握粟出卜自何能穀古人不
能自己之情豈一端哉溽暑舟行萬惟自愛

與詹陶山學博

執事素明經術歷試師儒所至教有成績為國作人之效多矣且能急流勇退蚤賦歸來出處之義全矣矧之身都將相而名節無聞者其所得孰多邪謂之曰居嚴陵之鄉聞風而興起焉者非邪日前重承枉顧足慰契濶病中未由登堂姑此馳問薄幣小書用申賀敬

簡桂近菴僉憲

自公之出常謂行止非人所能乃今竟得表請以去輕如脫屣畧無粘滯讀旅寓偶成之作益信賢者規模素定出處應時平生學力于此驗之敬服敬服向辱手諭

久擬奉訊抱病成懶心切耿耿耳僕久居木石忘情鹿豕惟是嗣親一念莫能自慰然亦惟敬脩人事靜俟天命耳相去不數舍何時合併以叙濶懷姑此奉候時事有可見教者否

簡張東沙都憲

承頒教賦役規則其再拜而徧讀之仰見明公體國經濟為民造福德至渥也甚盛甚盛一方數世之澤諸司庶正之式實在於此甚幸甚幸僕舊惟見浙中有此乃今於吾省見之且知公之行於閩楚洛蜀有素矣仁人之利博哉他日平章軍國以成一代平明之治端有

在矣謹勒疏奉謝伏惟自矧

簡呂中石通叅

別久無任懷念比承手翰并教示律呂古義此我丈夫
人性命合一之學如有用我執此以往禮樂其可與乎
容臺之擢得以迴翔散局需之時義大矣哉虜患可虞
江湖之人惟有乃心王室耳第賴庇舊患俱脫時理舊
殖遇有會心處恨不得就有道一證之也風便附此惟
自愛

簡吉陽近菴兄

日前忽聞冲菴兄之變不勝驚悼冲菴官登三品不為

不貴年躋六袞不為不壽脫有兒息為不死矣然而尊
人大事未舉遺孤在抱諸寡少依俯仰今昔何限存亡
之感身後之事得吾二丈為之紀綱當無所恨但渠宗
素單凡可以圖惟久計者皆賴吾二丈善為之所耳斯
文骨肉平生久要當不負于幽明也僕素辱冲菴兄之
愛不下二公所恨相去之遠愛莫能助亟欲匍匐往哭
以郡城方有主司者在姑此先致問訊統惟照鑒

答尤祈門子璋

南宮魁選差酬宿學然丈夫得志立功德于世以圖不
朽者固自有在作縣親民足行所學得聞祈門新政無

任歡喜于此能單厥心則宜民宜人推之天下可也前
輩如楊東里得君行政尚恨不為縣令真知言哉僕昔
試縣時少師桂見山謂之曰古人血食百世去思無已
皆由循吏得民之故竊有志焉而未之逮也今以為吾
子瑋望為昔人謂若生子固不在厥初生自貽哲命終
身事業皆基於此不可放過今人作此官鮮克令終蓋
書生初當事权利一為氣所動物所移則大事去矣
知子瑋大器深識可以語此他日治行稱為天下第一
策名清時寔所願也僕才劣數竒且嗣親之念未遂四
五年間與木石居惟有耿耿一念未能忘耳知已何以

處我相見末期惟自愛以膺大受

答桂近菴僉憲

忽枉手教且示所為中菴兄墓文讀之至一年三世俱
盡語不覺淚下嗚呼天之報施善人如此哉豈真夢
者邪再讀銘語知公之所悲者深矣尚何言哉吾郡氣
運落莫要之無久而不復之理恐亦方盛之時斷削太
過栽培斡旋正屬吾輩今日事不可但放過也吾丈行
誼素高足以張我赤幟盍共圖之以為後人之地何如
僕山居暇日稍葺舊殖間有著述畧表秀才而已非敢
擬於作者今諸稿畧成當從容以就正有道也小引三

首寓上以為他日張本云更有出處心事欲謀于高明者旬日間當泛靈溪之棹冀圖面盡也

與陳玉虹判府

弋陽草寇初發事在相機撫捕不可輕視恐致滋蔓明公之行衆所現望必在有備莫若先遣大牌示將即發嚴督該縣尅期撫捕明給榜示諭以禍福罪止首惡脇從勿問檄徵諸縣民兵示以進討勢當解散兵有先聲後實此之謂也惟裁之

答朱南崖學博

辱贈言之厚此上臣事君之忠願不德何以當之然持寸丹以求不負則素志也敢不拜嘉昨泛舟一首用代謝簡詩曰野渡橫舟不記年竭來還用濟長川春濤穩倩東風力不教滕王得助天

書報二峯兄及諸姪

到京主僕皆安惟是畿甸水荒物價湧貴外警內訌人情洶：時事大可憂世態非昔比諸老舊雅猶在一時豪傑相知亦多船到江開未可逆料大兄近况何如所患少減否宜慎起居調飲食以俟元氣之復無苦用藥攻之耐煩以養心省事以養神家政委之諸姪可使練習世故不然我雖勞而彼不知創者艱難非所以成之

便風附此惟大元順時自愛

答朱鎮小學憲

違教既久仰德殊切恭惟振鐸閩海適駿有聲君子作
人之功於斯為盛昨過錢塘見思翁語及榮滿已騰薦
剡且道盛德甚悉名寔在人不可誣也某以出處未明
勉強此行所幸得遂親賢以慰夙願去時正值西北水
荒中原盜起漕河多梗迄歸適師董二寇就禽徐房之
間河復故道二洪皆為安流草澤不桀自塞凡此皆得
天之助足占

國祚靈長之慶所可憂者胡虜海寇為患孔棘何如何如

初歸值仲氏之喪入閩擬在春初附此奉候惟寶愛以
棟斯文

簡陳環江太史

客歲寓京極辱諸君雅愛濱行又塵却餞禮意頻蕃斯
文骨肉無以加矣潞河舟中披誦廷對乃知君子所養
務為董相之正言而不為公孫之曲學且持論不激從
容懷至所謂引其

君於當道者非邪伏讀制策蓋

主上方蓋疑其下而責難于臣所對以君臣相得交儆為
言務推誠以為主既始之以御臣之道復終之以取人

之本真得君臣克報之指誠足以廣
上心以明臣節惓惓忠悃庶幾不負格天之業基于此矣
深為吾道之慶使時無此對則後世其謂何吾環江有
此根器所願終始此學坐進此道他日為時賢輔以成
其先賢之信益微

昭代得人之效矣至望至望僕方擬促裝得憲友歲貢生
方琅之便附此奉候琅寔貧賤之交竊懷識韓之願幸
與其進惟望愛以副時望

簡鄭澹泉漕使

客冬過真州得徐工部之便曾附候啓想徹視司次抗

聞司寇之命未幾復聞總漕之命此君子大行之幾
國計得人之慶也蓋督府寔當南北要衝江涯保障况值
民窮多故誠得我公真才實學經畧其間軍國生民永
有賴矣古冲公再柄台司風采意氣自足以鼓舞一時
豪傑天下事無難為者其繫重今日士風吏治者甚大
若公誠以剛正之體益妙圓神之用擴包荒之量用成
保泰之業則君子道長之福乃未可量吾丈平生知友
心懷愛助定以為何如惟倍萬室重以對揚休命

答林寒谷翁憲副名有年

惟天純佑

國有老成倘祥洛社與謀謨

帝室其輔德善俗之功一而已矣我公名德介壽真如靈
光歸然獨存所謂人瑞者非邪即辰諸巡臺語次道及
盛德此固觀風者之所樂聞也退見使者承書儀遠及
足感念存自顧涼德何以當之某不佞徒以出處未明
勉強再起無足為地方之賴高明何以教之伴還附謝
別疏少將候啟惟願養天和以綏景福

答吳海亭少參

某素欽高義近得承顏領教乃知君子所養不偶然也
承諭福寧當山海之交調攝為難亦惟智者隨宜保齊
蔬食少肉自有一種滋味昔坡老久處瓊海自言不為
瘴毒所侵者絕嗜慾節飲食而已公出雖若少勞然獨
宿猶勝服藥風便附此惟自愛

啓介翁閣老

某不佞在昔承乏祠部獲事我公誤蒙殊遇顧才劣數
竒重叨再造之恩而至愚極陋莫副國士之知教載家
居江湖跡遠自分絕于長者客秋至京乃辱眷顧如初
濱行又履賸贈愧二慙二有加無已某不知何以得此
于門下也公以日鑒之誠膺

聖眷之隆天之所以壽平格與

上之所以任老成者於是乎在蓋公以

三朝耆舊留佐中興而一念憂勤惕厲之心謙虛握哺之懷老而不倦此與衛武之儆丹書之戒咸有一德其視有唐汾陽中書之考寧足多哉某海徼孤生每於中夜仰占泰階之平以為世道之慶而已茲因南風頌上起居伏冀倍萬寶爰以迓

天休以答中外之倚望不宣

啓冲翁家宰

恭惟名公間氣碩德特受

主知登庸迪簡付以官人安民之任天下想望風采非一

日矣矧茲

綸召賜環適當維新之會宅揆待鈞進賢遠奸所以酬榮遇而挽世風以終其堯舜君民之心者胥此焉在在昔名臣有若商文毅王端毅其人者皆能不負平生為時阿衡所謂相亦有終者非邪我公尚友古人比德周傳固當超邁文敏之業以為閩士之宗所願益擴包荒之量用成保泰之業寔為吾道世道之慶比觀邸報得誦陳謝之章至登良宅俊藏用顯仁語竊窺君子正大之體圓神之用蓋有匪夷所思者矣此固今日海內豪傑之仰望者也甚至愚極陋勉強再起以明出處之義重

叨大方心竊惧慙而惟思自靖以自成其先資之信焉
耳恃在教下謹勤疏以候起居伏冀寶愛以答眷命以
副時望不宣

與尤思所

客歲過休寧會林山泉具悉祁門治行而得之輿人者
尤多至京見東臺兼山諸公其所稱述亦無異辭惟言
思所事上之禮稍亢遂使盛美弗章過徐會及泉丈語
次及之可謂知己第所言事上一節畧同夫獲上治民
即是一統事故曰愷悌君子宜民宜人今思所能得士
民之心而不能善事官長以終冷譽須求自己未盡

處乃可合道無曰吾能自信便了僕平生不敢失已亦
不敢失禮於人然且所如不合今為此言者欲思所得
尚于中行耳南臺風紀一時公議尤所繫重今得思所
其人相與同事寧非世道之慶哉僕數年家居求吾所
好勉強再出圖以明出處之義耳再至閩中猶慚故吾
惟求自靖以期不負所學無辱知己而已今即至辱翰
教副以嘉貺足感故人之厚風便附此奉問薄帕小書
聊將遠忱惟寶愛以副時望

簡王導巖

遠教既久仰德殊切側聞吾丈山中靜觀所得益邃開

來之功比之用世之業蓋有同為不朽者矣其才劣教
奇數載山居求欲寡過徒以出處未明勉強茲行來教
云：此乃大賢進退身繫世道者之事豈區區淺薄所
敢當哉然不敢不圖自靖以負君子之教謹此奉謝惟
望愛以副時望

簡蔡可泉

違教頗久仰德殊切去秋至京適聞海上之役雖言者
論事苛責之過然一時公議未嘗不以倉猝所遭之難
不足為賢者利用之病也吾丈暫藏器于身以觀時變
徐起以收桑榆之功以究平生之用未晚也今日當局

者彭草亭且被逮而午山丈方候竹墟公之代蓋尚未
知稅駕之所也時事至此豈不誠大難哉古之任大臣
者任之重而責之重今之任大臣者任之輕而責之重
謂今人之不如古非通論也其數載家居求以寡過勉
強茲行徒冀以明出處之義耳高明何以教之初至吏
冗未能馳候乃履先禮益用感愧別具聊致候啟

簡朱兩厓

其不佞然于當代名德如我公者雖未獲親炙而實切
嚮往蓋名寔在人精神默契無論識不識也閩中新刻
薛文清公全集乃得我公為之敘述使讀其書者得知

先生之學本乎一誠凡書之所載乃其平生之故寔使善學先生者必立誠以為之地真知言哉其在祠部時言者請舉先生以從祀孔庭事下

廷議一時論者莫不重先生之為人而特少其著述之功有謂先生於朱氏之學未若黃幹金履祥許謙輩推以從祀為過者心竊惑之蓋孔門之學惟求仁而已故孔子獨稱顏氏之子為好學而後來舉以配祀先師亦以復性為言豈多其著述乎先生之學從事於復性與不遷怒不貳過同功現其踐履篤寔深造自得直欲以身明道固顏氏之徒也先民以多言害道為憂以立德為

不朽第一事若進先生從祀以倡求學其於世教豈少補哉今讀公言知先生心事與書為一致固不待後世有知楊子雲者矣敬服敬服茲巡臺王泉趙公遣使之便特附區區景仰之意

答李彭山

某不佞於一時海內名德如吾丈者嚮往有日第未得親炙為快忽聞文旆將詣泉郡泊舟茅原即欲造訪使言行李亟發不果承示讀禮疑圖展誦序文足徵知言之學寔得孟氏宗旨讀周禮者當以是先之可以得吾心之節文以印證周公之典其所損益真百世有可知

者立言之功甚盛甚盛且聞更有新著拱候回車面請
教耳

答黃六橋司諫

恭喜治行卓異

詔擢諫垣深為賢者得志行道之慶然古今名臣居言路
者未嘗不以積誠為先識達大體為務庶幾君德治道
有所倚賴此謂拾遺補過之職非徒撥入人之長短以
邀直名也知我六橋素抱不凡恃在知己敢以此言進
也僕才劣數竒家居既久勉強茲出冀以明出處之義
耳知己何以處我今第秋元至承遠書先禮足感念存

附此問候且以為謝

啓張丰洲司馬

吏人潘文質去嘗附候啓想達記室使至辱賜翰教深
感念存恭誌

簡迪錫命重畀節鉞兼總臺綱削平倭寇假以便宜之權
益弘參贊之績以明公雄才大畧必有壯猶勝筭永清
海波載寧南服此固中外之所倚毗豪傑之所仰望者
也竊謂今日之勢強弱繫乎西北虛實繫乎東南而強
弱之形尤本乎虛實之故頻年海賊分寇浙吳其所殘
破皆我財賦之地况鄉導從附多我土人不蚤掃除為

患未已此病在腹心固虛寔強弱相因之勢不可不亟
救其敝而豫為之所也已杞人之憂諒明公計之熟矣
倅還謹此申謝惟寔爰以副當守倚重

上巡撫王思質公

伏聞

簡命移節宣大當今之時北虜南倭交侵入寇而虜患尤
棘北門鎖鑰非公不可公以一身佩天下安危之重受
主上特達之知壯猶勝筭謀出萬全必有以坐摧強虜翊
贊中興者矣節鉞北征職殊守閩南未由扳送無任瞻
戀謹具啓箋額差舍人鄭愷齋上臺下用布微虔

簡蔡可泉

比來海寇勢甚猖獗犯浙西者歷海寧海鹽崇德嘉秀
而嘉善之害尤慘蘓松亦被圍城滿欲而退不離近港
思質公移鎮宣大代者為及泉公竹墟公雖代午山丈
欲甄辭免發言盈庭迄無定策將來事弗敢知也來教
詢及著述事僕非其人也數載山居稍輯

國朝事寔為大紀凡例大約準資治通鑑綱目與昔年張
生天衢所見者體裁稍異然事體重大所愧聞見寡陋
不免掛一漏萬終脫初稿尚容就正有道耳

答徐豐厓

武林之別勿復十年懷仰高誼有如一日近來海寇猖獗所殘破者皆東南財賦之區患在生民憂在國家非細故也言者請增督府廣募援兵為事然亦迄無定策且兵難遙度誠不知其所終也海鹽寔當寇衝父老播遷調發良苦老夫以耆年丁此寔難為懷亦惟順時自愛以介眉壽耳鄭子壺陽能悉心保障寔民所賴惟邑中長者匡其不逮共濟時難是所望也僕抱疴家居八載勉強茲出以明去就之義耳無足為故人道者壺陽人便附此奉謝臨風無任恋二

簡呂中石

客歲北上過滁陽值公出不遂請教及至三山道僻吏冗復闕奉候懸仰殊切近得邸報乃知懇疏引疾乞休竟遂高致第一時名德如吾大者固當置諸廟堂輔德彌遠以佐化理乃輒使之投閒豈不重為明時惜哉然君子作人善俗之功與安富尊榮之業亦一致而已矣吾鄉民風士習大非昔比今得吾丈歸來有所表正未可謂造物者之無意也第勉強此出亦冀以明去就之義耳終得好歇腳處便欲相從以求吾所好也茲得白沙承人便附此奉候惟自愛以介景福

簡王遵巖

其才劣教竒惟求不負初心以自靖自見而已未嘗不
安愚分也來教憐之懇切若于我有心惻焉者此故人
知己之愛殊非不佞之所敢承也季彭山以孔孟事蹟
圖譜見惠并覽佳序具見孔孟存神過化之用貞現貞
明之體而世為天下師者其道如此實足嘉惠後學甚
盛甚盛然而孔孟之以師道自任者時則然也天生下
民作之君師義農以下諸聖寔兼盡君師之道禹臯伊
傅諸聖則以道相天下當是時天下相忘於道術無事
於講此學也至孔孟則思以道易天下而不可得乃徒
事於講明此學以為結往開來之地故以師道自任者

寔時則然也高明以為何如彭山所著春秋私考既有
荆川之序又得吾丈再序更為發揮足証此學不佞何
敢代大匠斲邪若刻梓未全者僕當力為成之冗中草
章附此諸惟照亮

簡袁裕春

福寧東路草寇竄發出沒無時漸不可長此賊大率鹽
徒坑徒監徒多土人坑徒多秦順政和諸路流民會杉
洋捕盜缺人諸屬無有統攝已會委高提舉從事猶恐
官非特設人懷觀望不足濟事况昨初五日之報其勢
轉劇若不亟圖撲滅恐致延蔓為患未已昨與篆江公

計必得守巡道親按其地徐圖方畧相機驅逐計禽首
惡開釋脇從以靖海隅惟我公留神地方幸甚

答袁裕春

東臺夫人還得翰諭知留神地方之事幸荷幸荷然在
今日惟有嚴加隄備以遏其萌密訪首禍之人以計禽
之用寘于法以正其罪自餘悉置勿問以開自新之路
否則人懷疑惧反生他變蓋殲厥渠魁脇從罔治自來
彌寇安民之策無出于此不宜輕發前所獲者急付有
司覈實不許指攀則人心自定且強盜止理見獲亦法
意也我公勇於當事時輩所難然須臨事而惧好謀而

成幸無輕于一試也遞中草三附上統惟高明裁之

答王遵巖

某不佞得叨叙遷在愚分亦既過矣乃辱華劄腆儀之
及而雅意猶為僕遲之且念其無所援而得此幸其不
至失已非故人道誼相知之愛何以及此蓋進取不足
言而私慶公道之猶存也惟當益思自勵以求無負君
子之教而已便風附謝今當遠別良晤未期臨風無任
瞻恋

簡趙龍巖

某十二日發建州十四日次大安明當出關相違日遠

瞻恋益切然神交心會固有千里如對面者別不足惜也外職官考冊底二本附上蓋出一時聞見未必悉得其真然絕無好惡贊毀之私或可以備參考也故不敢蔽吏人還草：附謝臨風無任增情

啓介翁閣老

去秋獲拜教劄慰諭懇款極感我翁汲引後進不遺遐遠至意此雖盛德憐才與人為善無已之心殊非不肖之所敢望也某自顧菲才得叨叙遷寔出門下獎諭所致蓋將使之獲究其用以無為知遇之辱也敢不益思砥礪以圖報捕萬一仰惟教翁以宿德元老久柄机政

上佐

明主弘濟中興弼亮恭勤夙夜匪懈其翊贊密勿斟酌元氣天下陰受其賜者多矣今四方無事惟東南海寇孔棘上履廟堂之慮蓋所可憂者吾人不知順逆從亂者衆匪直倭夷之逆命也平定安攘訂謀勝算必自有在矣某今當入粵江湖跡遠瞻望情切謹馳疏奉候起居伏冀順時寵愛以答天寵以副中外倚重不宣

簡揚虞坡司馬

某不佞幸託明公年未誤辱知己言念疇昔公以雄才遠畧當職方樞筦之寄時方多事中外日夕奏報凡干

邊情兵政區畫調度動中机宜有若頻年防秋及經畧
交南皆關係安危大計莫不豫擬素定處置當可非真
正大英雄其孰能與于此時某方承乏祠部得覩盛烈
自謂俎豆之事或可與聞而軍旅之事豈易言哉既而
各領學政惟公克舉其職秩日以晉業日以弘遂為百
辟具瞻一時名臣不偶然也某才劣教竒雖初志弗易
而偃蹇不遂愚分固然癸丑再會金臺重厯顧念之厚
迄今不能忘近接邸報側聞特受

簡知晉位司馬軍國大事寔倚毗焉蓋今日承
恬武嬉駸馬多故矣教窮理極
平日久文

朝廷思得真才以佐中興非公不可今東南之患海寇為
急所可憂者吾人不知順逆從賊者衆主兵無賴惟恃
容兵勢難持久誠不知其所終也我公訏謀遠猷必有
定筭矣某自顧菲鈍得叨叙轉已逾愚分惟益自砥礪
以求不負耳今當入粵江湖跡遠瞻望情切謹馳疏奉
候起居伏冀為國加愛以副中外倚重

簡周崦山中丞

某不佞幸託明公年末雖奉教日疏而仰德殊切蓋自
己丑釋褐之初會時議革新建之爵而併下偽學之禁
公特抗疏論之無所顧忌直欲為陽明伸大義于天下

其有闕于吾道世道者甚大即時格於勢而公論之在
人心者實藉之以不泯也及至海鹽每從澹泉丈得聞
高誼願為執鞭再至閩中又得聞公逸事遺愛風采凜
凜真足以廉貪立懦竊嘗以為如公盛德大節誠當于
古大臣中求之今公以夙德名臣特受

簡知入正臺端中外有位罔不洗心滌廣改觀易聽紀綱
風俗寔有賴焉此天下豪傑之所屬望者也東洲之後
又得明公殿之足為

朝廷有人賀矣某自顧菲才得叨叙轉惟思益自砥礪以
求不負耳今當入粵瞻望日遙謹馳疏奉候起居伏冀

為國自愛以副中外倚重

簡葛與川宗伯

鄉辱教音慰諭慙感服彌劇某才不庸劣獨賴正人
君子曲賜包荒今得叙轉實出推轂已逾愚分惟思益
自砥礪以求不負耳恭惟特受
簡知晉秩南禮爰立之兆基于此矣己丑登庸其在今日
有若我公暨虞坡公者德位並隆允矣八座具瞻一時
名臣足為

朝廷重匪直年家之光而已某四月得憑六月入粵江湖
跡遠瞻依益切便風謹疏奉候伏冀鑒愛以對天寵以

慰時望不宣

簡鄭澹泉少宰

去秋再辱淮上教劄惻慰懇至又為延譽當路非道誼
骨肉之愛何以臻此某自顧菲才得叨叙轉寔逾愚分
惟益思自強以求不負耳恭聞特受

簡知入秉鈞衡此海內豪傑之所屬望一時善類之所倚
賴者也蓋我公以真儒實學秉誠允塞淵之心抱先憂
後樂之志具知人之鑑懷體國之忠今得以盡用一世
之才以圖惟一世之治寔其素畜且際遇同心與之共
事豈不足以翊贊平明之政以上佐中興之烈也哉或

謂時亦有大難者不知君子之用世也其體正以大其
用圓以神包荒馮河兼資共濟乃為用世非為世用也
公固足以辯此使尚論者足徵真儒實用寧非一大快
事乎適過信城會巾石丈相與竊慶以為

朝廷用司馬君實韓稚圭陽德方亨真知言也某今當入
粵江湖跡遠瞻仰情切便風特修賀敬伏冀為國寶愛
以副中外倚重

簡屠石室侍御

某不佞雖未獲荆識而仰德殊切蓋某昔嘗試宰海鹽
于嘉禾有并州之念獲交先大夫辱有同臭之雅既而

執事宰我弋陽復藉其棠之蔭是故寤寐之懷實有出於形跡之外者理則然也今執事以治行之賢微補臺史主持公議風紀倚重名世弘業基于此矣某自顧菲才得叨叙轉今當入粵江湖跡遠瞻晤未由便風謹此修候伏冀為國如愛以副時望

簡李克齋都憲

遺教復十年于茲矣雖音問契濶而夢寐之懷常如一日先大夫年伯考終得公親視湯藥凡孝子送終之事無不得致其誠此實天所假也天之報施善人亦可睹已蓋我公名世大業自有其時而今日送終之禮獨得

忭于人心謂非天之所假不可况諸郎傑出勢若群龍並起則公之奕世盛美又海內所希此邦家之光非獨相知者之私慶也僕勉強一出今叨叙轉無足為請教者入粵過此極欲走吊又以家累不能自遂咫尺門墻瞻繫彌劇草此奉訊伏冀為道自愛以慰時望

簡黃小村判府

別久仰德殊切吾丈以仙侶暫出監郡實同謫仙南岳山靈足為地主而斯民則同借寇想賜環非遠而來教謂困阨迺有所激天之將降大任于吾人也理固有然者矣茲道出衡山發興欲登祝融以伏暑僅能一謁岳

廟瞻望祝融徒切仰止耳承遣使走候副以多儀足感
愛厚草草附謝尚容面既

簡唐獻葵大尹

敝邑當吳楚閩越之交疲民奔命要路無息肩之期今
得長者為之父母斯民其有瘳乎况浙東方有兵事諸
路調兵又所必由之地非伏賢侯豫為之所則騷擾之
患在所不免前輩官茲土者有若崇德周學山太倉陸
晉川二公至今遺愛在人賢侯欲訪其舊政父老皆能
言之僕以桑梓之懷且素仰賢侯高誼故敢輒及之想
亦賢侯之所欲聞也茲得宅上人便謹此奉候餘惟寶

愛以慰民望以需遠業

簡徐吾溪憲副

過府辱厚情且招邀登高覽勝足酬佳節遣兵護行以
出重險然而觸目駭心非止一端蓋搃人據險伺隙已
非一日前人建置沿江三城堡以事防禦為備亦切但
恐孤懸兵弱或為所掩有若近年弩灘堡之失事則又
不可不慮者今賴公德威坐鎮寔地方之福前日鹿門
破賊之功亦云奇矣而不免于忍老之口益信豪傑當
事之不易也見督府已道公難遠來意歸途始遇使者
廣東試錄附覽江浙皆未有聞使還附此不盡欲言

答張三峯總戎

久慕威名茲來乃得荆識延接緒論究觀著述乃知經畧遠猷名非虛得也當今多事若公雄才乃使居閒為世道得人計者能無拊髀之思耶故每與當道言輒及之而一時名公故未有不知公者使來辱華翰足感念存鄉借府江圖卷北軒高都閩相遇取以示之求得覽觀遂以付之因使納上想亦公樂公於人之心也草草奉答不盡翫縷

答陳敬亭督學

承惠廣西乙邗同年錄觀于錄序知所以垂教多士以致其敬順之實以從事于古人求志之學而迪之以大同之道者其指深長足為是會之盟矣甚盛甚盛使還附謝不盡翫縷

答徐吾溪憲副

使至承諭守禦府江机宜議欲修復廣運城堡併足灘兵為一軍庶幾兵力不分最為得策蓋府江三城上下百餘里戍兵合千餘人雖各據要害然每城僅兵三百今惟昭平可守而廣運足灘皆以孤懸久廢若合併為一使與昭平共為掎角所謂五指之更彈不若合拳之一拱是已又欲益之以狼兵一二百人以張其聲勢則

莫若量增岑武之兵斯事有專責且彼熟知地險賊情
為賊所憚乃可倚賴耳公謂何前人創置之易而今修
復之難天下事大都類此豈獨府江哉然亦存乎其人
焉耳誠有張古城鄭山齋其人事無不濟者今日中興
之業非公其誰章。附復不盡觀縷遶入見督府具言
之但謂岑武若再增兵恐後難制又生一患當別有遣
屬之該道可也

答雲泉宗室

桂林蒼梧相距一水之間雖音問或疎而寤寐不忘時
憶幻丘真境弄丸餘暇宛如望見履約親挹光霽頓忘

其為風塵俗吏也蘭墩總戎至獲奉手教副以梅雪佳
什捧咏移時清入脾骨逋仙絕唱情境不殊揭之座右
以洗我心獻歲當有省中之行計得面領清誨餘惟順
時調燮以茂對履端之慶不宣

簡畢梓石憲副

與公今日共作嶺南人三月間得再會晤接緒論亦不
惡矣發兵想此時已至信地軍中有小范老子在當必
悉中机宜以快人心玉石之辯非所憂也第恐兵形蚤
露或致奔逸耳僕時趨桂林舟中間取廣州志觀之凡
例體裁直有史法非秦泉子不能作也刻梓未久乃多

脫簡不可屬讀或令所司一補存之亦佳事也東里公全集必為我置一善本為愛蓋當朝相業如東里者殆不多見所垂世者悉在編中向來諸本散出非覽觀之便也千萬如願舟中草二附此不盡靚綾

答俞孚齋憲副

承惠西洲公集如獲至寶讀海洲文序文以為西洲室今之澹庵指其論征南配享二疏為詞真知言哉此可以不朽矣附謝尚容面謝

答學山少春

某以艱直素不諧時徒以去就未明勉強此出而竟不

得免焉命也所恨不能早自引去以負知己然亦惟求無負於心而已尚何言哉三水之遇寔出天假匆匆解纜瞻跂無及乃勞飛翰追送副以多儀雖君子用情之厚益增鄙人之感愧也金孔雀青絲布一縷用致留別之意用世事業所賴高賢伏冀自愛以副時望中夜呼燈草不盡欲言臨風無任馳切

答謝談十山翁都憲

某不佞才劣教竒家居有年以安無能之分徒以出處未明勉強再起而竟不得免焉命也亦愚分也所恨未能早自引去今與喪德敗名之士同為落職獨為此介

介耳然而自反之義亦惟求不負此心而已尚何怨尤
之有哉此從事蒼梧數月悞辱明臺知遇度越常格第
愧無以仰彌萬一既得邸報又辱垂念深惜慰藉再三
濱行復頒賜宴儀假借閔文以資行李自顧菲薄捐棄
之人其何以濫竽門下優渥之禮承荷弗堪惟有感愧
初夏抵家自此脫駕或稍理舊殖從吾所好耳伏惟督
府文武為憲嶺海肅清百福所會實有神相近者會寧
之後成筭有定執事不失惟是當事之人中遭多故不
免更勞紆籌為善後計也行次安仁風聞冲老變事謂
以黨逆謗訕得罪殆非細故護送人還謹勒狀奉謝極

不如禮伏冀台慈鑒亮其下情無任激切瞻恋之至

答桂近菴

某不佞才劣教竒家居有年以安無能之分徒以出處
未明勉強再起而竟不得免焉命可知已自反之義惟
有不負此心耳尚何言哉比舟過葛陽以當道行部在
郡未得入城用是不及待候殊切取：乃履手書存問
慰藉再三深愧廢棄之人無以報知己之德也且念及
嗣親之計曲盡居室之道體悉人情切中愚病孰味意
旨令人大悟非公道誼骨肉之愛何以及此：殆造物
者使公特發其義以啓聾聵者也敢不佩服以酬盛德

時事局面真如青天白日風雨驟至殊可駭愕歲星為
兩浙文盛之兆事有然者然海寇方棘慈谿新破禍福
倚伏之机猶未可測也前輩尚書陳公脩者寔弋陽人
洪武庚戌由郎省擢知濟南其治行載在聖政記與五
倫書所叙畧同辛亥超遷吏書以代郎本中未幾獲罪
以去滕毅代之具見孫九峯兩京吏部題名石其生不
表閭而沒不祭于社者畏簡書也公所考証詳矣今惟
宜述其行實于郡縣志表章之典以俟他日可也何如
何如向撰大紀一書已脫稿正欲請教初歸冗禩未及
檢出姑俟嗣往人便布謝草統惟台鑒

與姜廿五丈

承惠木犀茶高卧之餘時一啜之便香生齒頰矣謝謝
別示所編諸子要語足見吾丈老不忘學尋常田舍翁
安得有此第古今諸子非一家其立言亦不一而足吾
丈據所見掇其精華以自潤其身則此亦足矣所謂如
人飲水于河充腹而已蓋古人讀書有得其一兩語終
身受用不盡者知要故也坊中有諸子纂要諸儒集要
一書古今作者大畧具在吾丈更取而觀之當有進于
此者矣高秋菊花好時如能乘興一來則冰溪月下當
與細論也草草附謝不盡

簡林益軒憲副

恭惟榮擢臺憲備兵廣右深為百粵得人慶而不免為
吾民失父母惜也粵地雖風土稍殊在貴省士夫視之
則如東西隣也大才雖不宜留滯遐方然而行臺所蒞
寔兵政機務所繫重焉况由此而躋華陟要日見其大
行矣某素辱雅愛亟欲走賀未能不腆幣儀具諸別幅
用表寸誠伏冀鑒納幸甚

與常邑大尹楊蓮湖

常玉為唇齒之邑故雖未遂荆識而善政賢聲則聞之
稔矣僕僑居市中其居鄉中者尚多舍人弗戒致有暮

夜之戎以煩公庭深切愧慙顧辱留念赫然發號雖罪
人未得而踪跡亦既敗露尚望嚴勅捕兵及地方總里
期在必獲以示後戒則賢侯保障之功施及友邦而僕
之私感所不論也干瀆聰聽惟冀亮察

簡潘水簾司成

恭惟明公以一時儒宗晉位司成倡明正學以棟斯文
將來作人之效可以媲美成周棫樸之盛以人事君之
功於是為大他日柄用凡所資以為調燮之助者皆取
諸藥籠中足矣某不佞得罷歸來兀坐山中聊復稍尋
舊殖以自適耳所願大君子立功德于明時江湖散人

亦藉以永享太平之福也小姪廷相入監之便謹此奉
候起居小子得親炙門下以就有道實三生之幸伏冀
不賜鄙夷進而教之甚幸

答葉允升監丞

為別既久無任馳繫小姪廷相人歸自南雍忽枉遠翰
副以厚幣足感念存某素以愚直不諧時俗獲遂休閒
從吾所好心腹腎腸得為我用特尋舊殖聊自適耳惟
執事望重師儒行當進秩華要以行所學匪獨相知者
之私慶也風便謹此奉訊且以為謝廷相素少庭訓且
欠讀書幸為進而教之即所以愛僕也惟自寶愛以膺

殊擢

答江山尹黃閩川

別久傾注日勤比下車江陽道出敝里失於不知不及
致敬迄今以為歉徒以新政方嚴過於引嫌未及遣候
昨會小壻魯子具悉故人戀戀之意又承遣使存問副
以腆儀益以感愧惟我閩川在昔南城之政時已受知
當道名具薦剡加以資深勞績行當徵召擢任臺諫寔
君子大行之慶匪獨相知之屬望也兩浙海洋暫靖政
有餘閒惟自愛以俟寵命是望仵還附謝草草尚容額
裁

與徐臺石弋陽尹

聞取池州太平路由和滁直達京師約一月可到或由
省城取九江亦捷徑也但長途暑月猶在節宣崇護耳
時方多事正需賢才吾臺石以明識偉器足當大任今
又習知民事練達政體由是而當路秉鈞主持公議深
為

朝廷得人喜也昔人謂正直忠厚為立朝體要又濟之以
持重縝密言斯有補于當時傳于後世矣僕恃有一日
相知之雅且知臺石足以辦此也外象簡一具古劍一
口陽明先生敷奏錄一部用致折柳之意蓋期吾臺石

正色立朝卓然一時名臣也良晤不知何時臨風無任
瞻跂

簡桂近菴僉憲

久失奉候仰注日切比聞

正朝三殿之災實出非常之變修復擬工勢不但已然亦
不可亟也蓋大木難得非豫需而漸圖之則民力重困
而事難就緒昔者永樂辛丑之災至正統辛酉而後重
建告成寔以天變當畏而修省之念方新民困當軫而
寬恤之條初下固事體宜然非徒以遷都未定之故也
恐從此多事矣僕所撰大紀一書今始成編嘗教易稿

方事騰錄亟欲就正有道姑以淨稿一冊往公試覽教
當有以贊我也閱畢以次封去

與地師顧陵岡

僕嘗從縉紳間知陵岡名心切慕之及見所編發微厝
正通書與地理天机会元益信陵岡生有殊質學有奇
悟其仰現俯察心領神會真有得于天官地理之奧有
足以會諸家之大成非時師專門一偏之曲見所可擬
也茲欲圖樂丘之所思求得地必先能自得師今之有
道具正法眼者非陵岡其誰用是馳書門下惠然肯來
不勝大願想陵岡欲行其所學必務以指迷為功行備

此清秋登眺為宜願望飛鳥無任延佇

簡畢梓石憲副

自廣中歸來閉門却掃惟時理舊殖以自娛樂人事幾
廢故雖平生知愛如吾夫者亦未能以時修候蓋尋常
寒溫不足叙而出處義命之說又公素見豫定不足動
心者也君子亦惟盡其在我者而已其不在我者雖聖
賢不能必心苟不負尚何怨尤之有哉矧公之歸也上
得承懽高堂下得成就令子未究之志永有所託所賴
為不朽之圖者有餘地矣如僕薄命之人迄今未遂嗣
親之計亦惟修人事以聽于天耳尚何言哉茲欲自卜

樂丘之所惟地師難得其人近見貴邑顧陵岡者新刻
發微曆正通書及地理天机元知其為可人也但不
知此君作用何如在鄉里中亦嘗為人家得地否特遣
人物色之幸吾丈指示為我勸駕寔至愛也相見何時
臨風無任馳翹

簡寇惕齋方伯

拙作請教其時海晏初啓不虞遂至此極也欲圖善後
之策亦惟修復

祖宗市舶之政以無事處之耳蓋市舶備倭寔有並行不
悖者當事者以漸圖之則善矣高明以為何如吉安志

有副本願惠我一部感

答桂近菴僉憲

河干之會殊覺草草所恨仙舟遙發邈不可攀然而邂
逅數語極是懇惻若能領畧即使終日對面亦是剩語
耳謁三清山佳章已從韓生扇面見之真可與此山寫
影再讀五言亦絕佳天風白袍直欲仙去畧無烟火氣
矣甬江之沒在渠若得如此結果亦云幸矣倭患未殄
後來當事者不知其伎倆又何作用能了此耶木運方
亟加賦不免民力既竭日多事矣使回附此不盡款言
外小東奉候吉陽兄幸為致之

簡尤思所僉憲

此承存問極感舊愛我思所清才雅望一時推重監司
得賢風裁所倚當路有相知者必別有借重在思所當
無所不可也時態雖不易諧而君子撫世其用圓神固
自有餘地矣高堂萬福眉壽未艾辰夕起居可以時達
猶足以慰游子之情矣謹茲勒狀用致賀私未間惟為
道自愛以副時望

答畢梓石憲副

此聞詔論平粵功吾丈在進秩之列雖非讀禮中所與
聞然而猶幸公道存焉耳顧地師留此凡閱月所見非

俗師可及作用亦不奇可與商量者也堪輿之學即仰
觀俯察之事堊云卜兆固其指也今觀古人卜洛卜于
楚丘可見已今未諭奪神功徼鬼福即五患所當避者
然造物巧藏善人奇遇不可強也大工亟興加賦不免
恐民不堪命日多事矣近傳南豐及延邵諸路盜起而
南豐尤切桑梓之憂不知得解散否區區嗣親之計猶
未有託重厯在念亦惟修人事以聽于命耳使至領手
書嘉惠及韓魏公重修北嶽石刻極感按魏公所記重
修北嶽廟碑謂北嶽之常居五嶽之一今廟在曲陽境
方言稱大茂山不著嶽名有唐以來不知其遷廢之由

亦未考耳在昔帝舜肇封十有二山封恒山為北嶽在
今渾源州境內歷虞夏殷周以至于唐未之有改也及
五季之衰恒山陷于契丹故宋人遂以白溝河為北邊
乃移柴望之禮于大茂云我明混一宇內弘治間乃用
言者釐正嶽祀于恒山以光復虞舜之制惜魏公不及
見之耳漫及之以就正有道便風致此不盡欲言

簡王敬所學憲

某不佞雖未遂識荆而仰德殊切惟公以一時名德主
典斯文教鐸所至士知向方為國作人之效以人事君
之忠於是為大客歲行部敕郡校文之暇時與諸生講

明此學使之坐進此道甚盛甚盛某踰伏山中何幸身
親見之茲惟履端之慶謹勒狀奉候起居伏冀台照

簡張象谿司馬

某憶昔在蒼梧時再承手教極感知已之愛不啻尋常
年雅寅好而已自惟良薄無以取信于人復爾翫豔不
能諧俗積戾招尤為時所棄亦愚分也自反之義惟有
不愧此心耳尚何言哉尚何言哉歸來山中杜門却掃
人事幾廢故雖平生知愛如我公者亦不能以時修問
非相忘也朝野之勢則然也小姪廷相得執事門下在
諸生之中特荷猶子之愛孫丞回復承寄聲此大君子

用情之厚則然非所收望于天上故人者也我公以經濟雄畧參預留鑰机務寔為軍國倚重從此入秉國鈞平章政府其所建立當為一代名臣使野老得以永享太平之樂寔所望也克齋公此出寔為江淮保障時方多事正賴公等豪傑協心宣力以共圖治安也便風謹狀奉候伏惟宝爰以副當宁中外之望

答范東明方伯

僕自投閒山居杜門却掃人事幾絕故雖平日仰慕如明公者亦不能以時通問惟公方岳望重台垣地切爰立非遙此君子大行之慶也時方多事守正宣力正賴

命世豪傑耳山中木石間侶得託優游遣歲實大願望末教獎借太過非所敢承惟杖藜之暇時理舊殖遇有會心處或付頴褚輩聊表秀才而已不能如鎮山見峯

公所云也

國朝典故洪宣以下未得全錄多襍出者俟毛承人至當檢其可錄者應命使還附謝草：惟宝爰以承簡召

簡康殷石峯

曩辱答翰但薄愧畧不鑒納殊切愧報此心蓋闕如也我公資深望重迴翔藩臬多歷年所而叙遷猶爾遲遲此足以占公所養所趨時輩不多見也然而名實在人

柄用非遠宇內固不可無君子正人以培植元氣也聞
署司事吾民固望公即正位方岳以蚤見更化之政耳
僕閒居之暇惟焚香却掃稍理舊植以自娛樂他無可
為公道者茲小价赴省之便謹此奉候惟室爰以俟簡
命

簡周鑑塘

仰惟明公愛民禱雨竟得井澗卒獲有秋山中野老得
遂鼓腹擊壤之樂敢忘所自聞大同園解寔

朝廷洪福而閏寇勢亦衰卻又方隅之慶此時事差強人
意者比聞公以幻殤感懷不勝談虎之變第修短有數

無如之何盛德如公自宜有後所幸竟中順變以俟天
定老泉晚得二蘇蜀中故事也僕亦屢膺天損惟益修
人事以聽于天蓋生子遲速有命可以裕待而無庸急
憂耳僕以衰邁尚復爾耳而况壯年如公者乎故惟僕
可以此言進也近建石坊借重尊術用託不朽不敢不
告

啓張蒙谿

小姪廷相至極感顧念之厚并承教貺之辱且慰藉勲
懇似於某有深惜焉者雖明公愛惜人才不遺遐遠曠
度若斯然非不肯人之所敢當也時方多事惟國家規

模弘遠法制周詳雖承平玩愒之弊勢所不免若當局者能隨事振舉以復其舊則天下自無事矣竊觀示教修復留都軍政諸事皆隨時隨處振舉綱維以圖復初制深識壯猷寔補偏救敝之術撥亂反正之畧也如議調浦口軍以入衛移河池軍以策應以益都城保障極為得策又請校弓馬以寓軍政尤得國初比試法意蓋武職雖得世官而承襲則重比試必比中乃得襲職三比不中則謫罰行焉是固寓選舉於承襲矣又豈患將才之難得哉今比試以賂成而新官復例免近例又得以貲免夫比以賂成猶倚法之弊也而使得以貲免則

為法自敝矣是何怪乎武弁氣習之壞所謂未論無兵先苦無將者亦勢所必至也誠能力行公策亦須救得一半且足以補比試之所不及至若議處選補軍政視篆俱為救時急務且不動聲色妙用圓神平章軍國具在此矣前輩論留務者自馬端肅喬白巖之後殆不多見側聞大同虜解虞坡公已入京聞警亦稍息此皆時事之差強人意者故鄉亦有秋民惟苦額外之擾耳小姪廷梅歷事內守備欲就試應天雖學未成章而志頗向上公能垂念猶子俯賜汲引俾小子有造實僕之所深願也而非所敢望也餘惟寶爰以副當宁中外倚望

啓鄭澹泉司馬

丙辰之秋小壻魯應華南還遠厯教翰試錄之惠深感
記存嗣後無緣通問蓋亦朝野之勢殊耳惟明公德望
益隆

簡毗特重位晉八座職掌三軍具撥亂反正之才以襄其
安內攘外之畧固其平生素所畜者頗憶劉松石當辛
丑壬寅之間疏言修舉團營事宜多切中時弊而竟莫
能盡用其言不知今之視昔所救之弊又當如何非公
不能辨此然時亦然有大難者吾人亦惟盡其心之所
當盡力之所可及者而已然亦在公深識遠猷包荒馮

河中行是尚其作用妙處匪夷所思也某山中却掃日
省愆過或時理舊殖以自娛耳無可請教有道者往年
嘗見王晉溪西夷事跡召環新疏乃未及見便中得見
惠感感應華此行能得志否倘謁選得微福我公獲善
地養母則所以顧惠華者即所以愛僕也干冒台嚴不
勝懇切祈祝之至

啓李克齋中丞

去冬憲節過此相對真如夢寐明公以時望攸屬朝議
共推再起東山作鎮南服且開府維陽控制江淮根本
之地寔資倚毗前所未有也我公靜觀素畜富有經濟

凡正己格物敦文養武以慎固畿甸保障江淮者當亦自我作式以圖遠猷亦明公之餘事也風聞初至時不相知者輒有煩言世塗人情此亦常態惟公益恢大度以弘遠業凡非意之來勿存忿嫉惟反求諸己久則物情信服誠定之效不可誣也特在相知敢以此言進願公察焉茲者小壻魯子應華北上之便附此奉候應華舊辱門下之愛未能自拔有可以教之者否惟寶愛以

副簡命

簡鄭壺陽

海鹽治行為天下第一拔置諫垣用旌異能此誠定之

效勸功之典也僕在蒼梧時會慶遠羅子具述保民禦寇之畧有古豪傑之風足徵有用之學用世之才也鄉謂壺陽言吾輩從政須得傳循吏享廟食今有在矣甚盛甚盛况尋常居言路者即有建明見之行事或多窒礙以未嘗經歷世故練習民事故也今壺陽於當世之務已習慣見定有所論列必中肯綮非徒言以塞責者比惟自來論進言者則必以積誠為務蓋正恐未信之故所謂補衮之職要在識其大體論人要在槩其大節則正直忠厚而世道公議必賴之矣此固壺陽素所蘊畜今日之所有事以為他日名世之休聞者皆在此矣

特有一日之雅敢以為祝茲小婿魯子應華赴試南省
之便附此奉問魯子亦頗有志見間幸有以教之即所
以愛僕也臨風無任瞻跂惟自愛以副時望

與周蘇泉教讀

象山殊非禪但微是內爾惟明道定性語最盡蓋內外
兩忘乃見一貫宗旨秋陽江漢皜皜體段本色如此象
山每從人情物理事變世故上用功絕異禪學其言道
問學總是尊德性工夫與孟子學問之道即是求放心
意同敬所所言一真一切語殊不可了也

答凌洋山少參

鄙作於

國朝典故竊欲紀其大者而已不敢言史然僅脫稿猶未
敢以示人昨遇大雅君子惓惓下問遂爾呈醜欲以就
正有道也副稿容錄完別圖請教茲未敢也幸惟鑒亮

答桂近菴

江干一叙又是隔年雖問候若踈而神交無間山人李
東泉至得奉手教宛如面語東泉果具眼者比顧陵岡
為僕相攸亦有合哉今將藉此為樂丘矣渠謂公所得
甚竒豫為後天之計固達生者之所為也何時扶藜相
從且圖一盃之謔時局物態又何足膺我懷邪昨見新

刻與吳龍津書及次達生佳什知公於此觀其深矣至
論龍溪念菴講學處皆能窺其微及叙巾石丈辯疑錄
亦中巾石論學宗旨皆有自得之趣近翁所造一至此
哉何時對榻一商新得以為大快克齋丈初承新命開
府維揚軍旅之寄難拘文法昔張浚治蜀以趙開理財
余玠治蜀以王惟中治賦即今如三軍兩廣軍門俱有
故事所由來遠矣今議事未有成命而言者輒議其後
益見常事之難從古則然惟國運向盛廟議允協庶保
克濟耳東泉去附此不盡翫縷

答羅念菴

曩歲會文從過敝里真若自天而下愧不能信宿挽留
臨風無任白駒之感第才劣數竒再出再蹶浮雲聚散
無足動心所恨先幾不蚤但冀不負此心餘非所敢知
也歸來山中恒思補過嗣親之計雖切心懷亦惟敬修
以俟天定耳兄以龍德退藏霖雨之望蒼生所同要之
有道出處寔閑氣運此論世者之不能已於懷而君子
所樂不與存焉地師周洛石至尊承遠教足感念存且
諗卜居得吉君平事了石蓮陽田與造物遊若使天意
有在恐蒲團打睡未能穩也周術于形家日家多出創
聞皆有實見信非時輩所及亦為弟相攸似有會心處

復來附此奉候并以為謝臨楮馳繫

○簡呂中石

違教既久仰德殊切令即君思至承道體多福并示新刻仰見日新之功周易卦變圖傳深得變通趨時隨時從道之義文王之所以為文孔子謂學易可以無大過者盡在是矣懷玉草堂之復誠盛舉也然事貴始謀今猶未見可久之計緒山公應聘而來足為後學得師矣第地主先去亦恐不承叔輿無以致崇道之誠以慰吾黨之望耳何時約會山中用尋樂處諸公寧無意乎臨楮瞻致

○答錢緒山

承示懷玉書院疏引具見茲山之勝曠與悉備有如從江上望九華又如入天台探桃源也夫茲山之勝得先哲表揭人皆知其奇矣至若藏奇不露必俟觀者心目所到乃自得之所謂抱璞守拙不輕示人則茲山之秘為造物所私不輕洩者至是盡洩之矣豈非茲山之顯晦有時而此學之絕續有待邪夫自有書院以來中間廢興凡幾而恢復規模未有盛于今日者然而事重謀始禮宜遵制若更塑先師像猶鄙心所疑使惟立朱陸二賢主則比于瞽宗之義尤切所謂其有國故則釋奠無

合者是已高明以為何如吾丈與中石先生共應當道
之聘來主教事深為吾黨得師之慶會見講明此學歸
于大同有先鷺湖之會直沂洙泗之源豈非天壤間一
大快事哉承召約會第未知中石兄蚤晚入山不肖當
約一二同志撰屨以從又按志在宋學士楊億寔生于
玉山蓋億祖文逸為偽唐玉山令億將生一道士袖刺
來謁自稱懷玉山人忽失所在俄而億生書院則後人
因而志之耳又來教引晦翁與東萊書有曰吾悔不得
自鷺湖遂入懷玉深山靜坐數月損約收歛又曰恐於
密切處不得如外事之易謝絕也以為先儒圖會之切

自省之密有如此者極是慊惻愚意晦翁此言已覺鷺
湖辨論太多直欲近裏着已然猶同於橫渠定性不能
不動之慮若論大公順應直體無欲為作聖要訣則內
外兩忘動靜皆定斯澄然無事矣尚何外誘之足慮哉
吾黨欲求此學大同殆宜從事於此亟欲求正有道姑
此發端

○簡錢緒山

懷玉之會雖不盡所懷然而不肖于公鄉性實久固有
傾蓋若平生信宿而久要不忘者矣白龍聯舟教語夜
分別去真覺公從天上來猶帶烟霞氣也日來道體何

如初至城中不免將迎之擾惟慎眠食調攝真氣自當
勿棄陽明先生事畧錄似請教辟之傳神公所述年譜
必得其真茲所編撰特表其立朝與經世大節用見真
儒實學非偶然也惟公一覽教之幸甚鍾文材所請
况中未及執筆姑俟再寄耳餘惟宝愛以棟斯文

○簡胡吉陽桂近菴吳學愚

懷王之會莫太章三諸公逸駕難攀予亦從此逝矣所
謂自當忘歸者果安在邪一咲然而登壇說法寔在二
公若象山之在白鹿特為諸生深明義利之辨亦所不
辭蓋亦出于晦翁之所懇請非強聒也何如何如緒山

公再留郡城又得聚會之樂前事不足恨也公從僕索
陽明先生部中公移特取其立朝及平寇平藩平蠻大
節表之用見真儒寔學云便中或取覽之何如人去附
此謝過

○簡呂錢二丈

董生輩携至志稿見示僕何敢與此蓋志以信今傳後
必得作者如公輩以任筆削之事斯足為此山之重中
間事體如祀典一節猶須商確穩當否則人將議其後
矣若教規類須入周程朱陸立教頭腦及陽明甘泉二
師講學宗旨然後附以戒約規條若二老會語皆可附

見此事不厭精詳未宜便入刻也恃愛漫及登山拙作
附上覽笑

簡錢緒山

賢郎至獲奉教劄第獎借太過非所敢當且承道體康
豫深慰仰懷見示歸越錄紀事敷義考終志感足備他
日史氏之採且令鄙人題引其端而愧非其人也然以
平生私淑之志竊願附名其間亦因以取正有道焉耳
倘不棄管蒯幸特加邦正無為此編之累如無可採以
覆醬瓿昨得董生書謂與水洲先生同載而西亦奇事
也又聞泉師將有武夷之遊或得南浦傾蓋之晤則公

之斯行所得益多矣第此時閩中方有倭患不識得以
從容臨觀否風聞巾石兄已往候不肖當瞻望青牛入
關撰屨就謁也時守巡當路皆按郡想亦以隣警之故
福城受困已久浙中援兵且至當此危急其患未可言
也吉陽公倘來遊懷玉宜俟秋涼請乘間言之何如還
棹在何時便風附問暑中惟倍萬室嗇以副吾黨之望

與魯子翰

自君之出荐臻家難內子不祿老母棄養雖大命有教
而二昆偕行病不嘗藥沒不視殮獨使孺子輩當此大
事直可躄痛殞絕終天之慟也當吾女之喪也令至道

輦殞之外舍以專視祖疾詎意姑婦相憐追隨長逝嗚呼痛哉嗚呼痛哉聞望廬至止亟欲徃吊畏于酷熱未果人回先此慰問

答黃中菴

修復山院雖出當路諸公盛意而作吳經畧寔賴明府主之賢勞嘉惠士類歸心疇昔之會因諸公皆去僕亦遂行未由辭謝迄今以為罪懷玉志事責在錢呂二老僕何敢當昨因下問忘其愚陋輒有所陳非敢任筆削事也承命致館穀益增愧慙姑此附謝尚容額裁

簡鄭葵山中丞

屬當方隅多事兩廣机務乃得雄才大畧如明公者以主樞筦之柄坐鎮折衝不但南粵賜履之地得受安定之福其風聲威望足為天南倚重者端有在矣况自來蒼梧旬宣得於靜觀素畜者非一日也葉毅陽明之績不得專美於前可豫知已即如十山翁近日寧會之役亦一時奇功此僕所與聞者也貴省倭患甚烈何以禦之即今所為誠不知其所終公懷桑梓之憂籌之必熟目下調兵無補安攘徒增道里之患所謂不戢自焚者也何如何如茲友人徐滄者赴廣西都事之任敬此奉候滄以卑官遠地得在當路照臨之下未為不遇臨風

瞻致伏惟寶爰以副當宁中外倚重

答桂近菴

比聞尊候遠和殊用懸切得來書及詢之徐友知久勿
棄甚慰尚須寧靜安養以保天和公善理身養性富有
得力處緒山公學得要領其會語立言或就學者偏處
歸約要之聞見之知便是德性之知所謂宇宙內事皆
吾性分內事若會得心無內外又何聞見之障邪僕近
得女未遂弄璋所幸生意猶存益修人事以俟天休耳
時下客兵屯劄極為地方道路擾害人無寧宇恐將來
之患未止此耳奈何奈何風便致此惟倍萬室爰以介

眉壽

○簡錢緒山

盛价至祇領章江六月廿一日書殊慰第獎借過情悚
息悚息承道體康勝赴會青原良朋久要舊學重訂信
宿未了計返懷玉在中秋後也
○ 泉翁老師有武夷之
約彼中方有兵事想不果往目下粵中歸師大為道路
之患殺掠無忌莫敢誰何此將來隱憂也奈何奈何不
肖謬辱二公不鄙以院志相託殊非所長雖勉強載筆
不免代大匠斲也慚悞慚悞屬稿粗成尚俟就正乃可
入梓山川志畧如初稿沿革志始未槩具惟是崇正堂

寔當廟前誰設講席請更名致齋所亦可具服制所宜
有也祀典志中有商量如初擬建宗儒思賢二祠今朱
陸祔食諸賢止宜總為崇德一祠便名宦取其有功于
茲山者更名報功祠亦以別于常制云院牒志公移書
疏畧為彙括入編學憲戒規附之院田志惟懷玉田賦
租入原額總撤得其詳東嶽博山所入惟有租教田賦
額數皆未備蓋案牘尚未吊回故也經籍志原具見在
者無幾俟考所從來入之教規志先以濂溪明道語次
以晦菴象山語又次以陽明其泉二師語用示學的二
公訓規會語請附于後文翰凡例取其有關山院者若
作于書院而有闕名教者附焉統惟裁定紀載之文易
簡堂記承命撰次求正有若明德堂記及吳復懷玉書
院記及院志前後序當屬之二公或請之當路乃可成
編惟圖之董生用時輩來迓附上志稿萬惟賜教筆削
幸甚

簡黃滄溪學憲

先正有言為

國家進賢以成一時治化者冢宰之事也為國家養賢以
成一時風化者督學之事也其關係世道吾道之重有
如此者今日敝邦教鐸乃得

簡命名德為之主盟一方士風民俗實有賴焉某不佞昔
在東海幸得親賢考績時致厯有道贈言以壯其行所
愧才劣數竒不能少有建立以見于世出處之義惟有
不負此心耳山中靜遠鹿豕忘情所願正夸大明士習
丕變以見風化之成也特遣一介之使奉咫尺之書用
致祝賀之誠伏惟鑒存

○答何吉陽撫臺

即辰學諭王猷率院生介使者齋至明臺書幣賁臨章
廬某謹盥手開緘登進拜嘉者某不佞竊念當代名賢
如我明公者雖未遂覲德而久切鄉往爰自賜履江右

保釐域中凡列郡人士咸在照臨即深山野老罔不衣
被比厯優禮匪頒敬附述中陳謝嗣聞台候偶爾違和
顧惟百神協相萬福攸歸天壽平格不偶然也懷玉先
賢遺跡數百年來中間廢興凡幾而恢復規模未有盛
于今日者非賴我明公寵綏至意主張于上而當路同
心共成其美何能辦此某也生于茲土有負名山躬逢
盛事殊慰夙願比者獲從盟會得質舊聞期于大同共
證北學一時師友惇惇于于聚樂道合眎諸鷺湖殆有
光焉自是懷玉之名當與四大書院相望于無窮矣倡
道作人之功於是為大院志之修宜付之作者庶以信

今傳後顧乃屬之鄙人欲其攬故發凡修辭著勝以為
茲山重不既難乎即使忘其固陋勉徇委命恐代大匠
斷終非所宜也初二山長以此見託再辭弗獲則為之
撰次初稿冀以就正輒為緒山子携去俟其論定別圖
以復尊命耳伴還謹此附謝伏惟台照

簡黃中菴

恭聞擢守獨山雖未猶循吏超遷之報然公能不求而
得之於今日亦公論之有不容泯者耳獨山雖遠然在
貴鄉視之則東西隣也賢者遠到之業藉此進階當無
不快意者巾石公輩相與謀贈言于僕僕不佞特重公

之行且以識民去思愧無以贈耳公行有日荒野遁夫
不能攀送河干如悵快何願益自愛別具聊當折柳臨
楮無任馳情

答吳蘆溪象山

往生輩還承宦旣清勝甚慰使至又塵翰旣足感念存
邑當濱海正值多事土民豪猾正須料理古人烹鮮治
絲之喻無忿疾于頑之意也初政不免心勞政通人和
則安之矣吏事鞅掌尤須寧耐於此練熟舉刃無全牛
矣此良工苦心之言願蘆溪留神焉他日政成即是誠
定之效不可放過土風當不遠眷屬在彼者順時節宣

斯善矣便風致此不盡覲縷惟自愛以慰民望

○簡張浮峯方伯

某不佞然于當代名賢如我明公者實切寤寐比駐節玉山獲遂荆識雖未能從容領教而覲德心醉迄今不能忘我公素繫時望爰立應邇久宅方岳以惠我人典刑老成猶見古道之存也興復懷玉山院告成寔賴當路諸公協心同事倡道作人之功於是為大院志之修用詔方來是宜付之作者而呂錢二山長乃誤以委僕而又重之以吉陽翁之命僕雖生于茲土自顧謏薄即使勉循諸公之意何足以為茲山之重第以國故之義

不敢終辭畧為槩括初稿以就正二山長猶俟細論昨緒山丈書來約明年暮春之會懼久未有以復也特錄似請教以俟裁定餘惟寶愛以需簡命以慰民望

簡陳羅江方伯

睽遠既久向仰殊切邦人何幸數藉休澤薇垣正位崇陰益濃時望攸歸爰立伊邇一方不能久專也遠承賜曆深荷念存興復懷玉山院工成皆賴當路諸公同心協謀共成盛舉倡道作人之功於是為大而吾丈復極加意經畧其間甚盛德也院志之修誠宜付之作者用詔方來而當路暨二山長顧以託之不肖不肖雖生于

茲土罔有聞知何足以爲茲山之重尚別圖請教耳願
此奉候惟寶愛以膺簡命

○簡王敬所大參

今日海內名流有志聖學者不無其人求其任道之勇
衛道之力如我明公者實鮮其儷蓋心印文衡天寔界
之不偶然也懷玉山院初自宋儒數百年來廢興凡幾
而恢復規模未有盛于今日者雖賴當路諸公同心共
事然而主張經畧悉在左右其興學作人休美有光空
同而宣揚寵綏德意可比白鹿非細故也院志之修宜
付之作者用詔方來顧乃屬之不肖不肖雖生于茲土

實愧國故何能為役初為呂錢二先生所委而又重之
以撫臺之命固辭不獲輒勉撰初稿就正于二先生以
俟論定昨緒山夫報書約明年暮春之會恐久未有以
復也謹錄似請教尚祈裁定幸甚餘惟寶愛以膺簡命
以慰民望

簡黃滄溪

自明公振揚教鐸力障末流而吾鄉多士咸思幡然改
具舊習以就矩範蓋不徒文體一變而學術心術亦知
嚮方矣此誠作人之機衛道之功也何幸何幸懷玉山
院啓自宋賢中間廢興無常而恢復規模無如今日之

盛皆賴一時當路同心共圖盛舉而建置初造又得我
公加意克相其成茲山之興當與四大書院相望于無
窮矣院志之修誠宜付之作者用詔方來而顧以屬之
不肖不肖雖生于茲土實愧國故何能為後初誤為二
山長所委而又重之以撫臺之命固辭不獲輒勉撰初
稿就正于二山長以俟論定近緒山丈報書期明年季
春約會慮久未有以復也謹錄似請教以求裁正餘惟
寶愛以揀斯文

答黃中菴

近聞公有抱孫之喜此天錫麟趾以售厚德之報英物

毓靈寔吾信產吾信于公有其棠之思而公于吾信當
亦有并州之情矣伴來辱翰儀之及榮行未能申一觴
之敬而顧厪留延之錫益增慚負謹此附謝尚容別裁

答范東明提督

比節鉞南下獲奉台教荏苒隔歲瞻望彌勤恭惟明公
以豪傑雄畧真儒作用專制虔南坐鎮四省德威宣著
方隅教寧先哲膚公不得專美于前矣不肖退閒木石
無所見聞偶有記存聊備忘逸安能如公所云惟相度
好善之誠不棄管蒯而鄙人敝帚之藏殊切主臣多矣
使至拜領教劄兼辱腆儀承荷弗堪感愧彌劇洪熙實

錄不知附誰竟未之得更無副本得別為抄寄尤感謹
此附申謝悃餘惟寶愛以對揚

簡命以慰中外之望不宣末余襄公武溪集刻在韶崔清
獻公全集刻在贛黃泰泉新修廣東通志及古小學女
訓并南野文集各見惠一部幸甚

與楊黼山上舍

雲林壽域賴公指授寔吉兆也何幸何幸壬丙坐向庚
申之年陰陽家所忌今取六月之朔大陽到向且日直
天赦宜無忌也惟是吞吐浮沉挨閃之法非得法眼未
易中的竊意吞吐之間前日所定亦是或稍迎生氣何

如浮沉之法以土星論之非五則十以今尺準周尺則
八尺即十尺前破土建域大約三尺再加五尺何如以
本山結局論之今大勢已挨左或微加右取氣從左耳
入何如凡此在吾夫其眼蓋已默識當有定論所願留
神為我折衷則造化在手非難事也何時北征尚容遣
候

答楊黼山

後天卜兆重承指授真訣自幸非淺八月甲午朔既取
大陽到向又丁秋仲甲廢午休吞吐法準毬簷掩耳浮
沉法以見金銀爐底為準挨生法亥氣從右入故微挨

左凡此皆定見確論造化在手豈時輩所及今當一準
教旨太極圈中寸土不去惟於四周穿築三和土耳猶
俟公他日一覆視之也戒行有期臨風瞻望薄其聊當
折柳餘惟日愛

○謝何吉陽撫臺

某也何幸得從廓翁諸君子後再上懷玉共證此學迺
塵台命俾有司日致庖廩極感緇衣之誠殊增素餐之
愧凡我同盟仰承明德相期不負用答山靈願附使者
敬陳謝悃臨風瞻慕伏希垂炤不宣

○答王龍溪丈

鄉懷玉之會遲公不至茲來真若從天而下維信宿未
終領教而所示諸作皆切先覺宗旨夢寐之懷亦既慰
矣儻天假懷玉後緣寔三生之幸也逸駕難攀臨風瞻
跋見緒山丈幸致意

與李尹新洲

大母楊貞節事昔年累有結勘當道列其行于郡志復
大書孝節以表其堂未及以聞者蓋以生前有欲表楊
之者大母輒令先人止之故沒後止載之郡志或表其
堂以厲世風耳今觀風者欲履實其事特具事畧以進
恐旌表之典有格于例然不敢不以實對也惟炤察

○簡東廓先生

兩中得成行否儻稍從容尚圖請教山院志稿煩檢付
去手明德堂記及山中題詠俟面拜頌

又

某不自意得緣懷王之會獲領教言之詳若積善為祈
天之本寡慾兆多男之祥當終身誦之服之共殆天假
至人授不肖以續命真方也武夷之遊名山復遇高賢
為之賞識青牛出關又增他日一故事矣山院志序願
人拜頌辰下漸暄歸舟萬惟自愛

○簡管南屏山長

山院興復得名賢相繼主典教鐸莫斯文之慶舉業不
妨講學公令諸生務令併從事尤得要領久闕修問時
於筆峯學諭及諸生處得文候之詳清秋氣爽物外心
遠所得應非塵寰可擬也別具崇德報功二祠神牌標
題凡十位請命書而刻之又季春之會宜準昨年故事
擇山石奇處大書深刻用紀一時之盛章：

答范東明提督

使至再辱教劄并鈐經董集之惠足感念存恭諭方隅
真安經畧餘裕凡為四省列郡久安長治計者當無不
至教世之福於是 在不但遠支十年而已陽明之業

豈不重有耿光即不肖之人遠跡江湖雖念念不忘憂而
救時大業則惟命世豪傑是望耳洪熙實錄已領館閣
漫錄幸終見歸廣東通志及崔清獻集余襄公集歐南
野集尤望記室在念使還附謝伏冀尊炤

與董茲齋春元

令先兄古川子之喪病中不能往吊心切傷之俛仰今
昔有不勝其嘔者矣聞已襄事其所後者亦能自盡其
誠矣乎

謝張浮峯撫臺

恭惟明臺欽承簡命撫綏我邦物外野老未能修咫尺

之書以彌邦人之慶顧辱先禮銜茅存問迂散雖大君
子盛德若斯殊非不肖人所敢當也拜登之餘無任感
悚謹狀附遞中陳謝伏希台鑒

○與教授何愧吾

承頒書院神胙拜領感服志稿正欲請教但後來更定
事宜尚俟付呈編入之耳祀典更議特祀朱子陸子于
崇德祠蓋重專祀也然二子於汪文定素以前輩事之
若位次居前則未安叙之文定之後又非專祀之意若
以配食于先師為疑則制固得從祀者也宜更詳之院
田在東嶽者凡田畝稅糧入院存廟之數各已詳備惟

在永豐博山寺者未見開報必得府上取具的數載入
文翰志有宜稍刪去者待入梓時削之諸惟賜教幸甚

簡江荆石太守

側聞將行部至縣寤寐不忘民食之艱遺黎赤子不啻
在慈母之懷矣然而中間事勢猶在調停銷弭不然則
地方之患尤有甚於饑饉之可憂者周禮荒政主于安
富恤貧除盜賊為急昔年閩中鄧賊之釁近時覺山溫
州救荒之變皆往事之可鑒者玉山為縣無極富極貧
之家即凶年亦無流離鬻子之事蓋地當路衝即魚升
斗之儲者猶得轉輸食力况今二麥將秋可以贖食惟

是夏秋青黃不接得一補助便可晏然矣適見施慕府
李縣令言及臺下惓惓為民至意輒敢布其愚慮幸惟
省覽寬衷應變靜以待之而徐為之所則凡思所以為
吾人計者必出萬全而地方永有賴矣冒昧瀆陳死罪
死罪

謝當道禮送祖妣孝節牌扁疏

恭承郡檄備蒙憲案行令本縣官師特製孝節牌扁用
羊酒鼓吹導引送至華門用旌祖妣楊節行以勵風教
者不肖孫浚謹率諸孫焚香拜迓謁之中雷特牲告祠
聞之祖考凡我戚屬宗人以及父老子弟莫不懽呼快

覩咨嗟賞嘆以爲事關百里風化不獨爲一家之私榮也後復竊念祖妣楊平生大節實出天性嘗自謂曰此婦義也吾知不負吾心耳吾何求此先人所以重違其志卒謝有司明揚之舉而表門之典故弗及焉詎意沒世之後人心不忘與善之公秉彝所切一時大儒暨當路名公每以奉宣德意用振世風爲重後先相繼褒崇有加井泉先生特爲作傳而憲學玉崖周公旣列其行實于郡乘淶江徐公復大書孝節以表其堂乃今更辱憲臺特加追獎始之郡縣覈實申之學校闡幽質之鄉評僉同詢之耆舊不爽蓋潛德閔而彌彰公論久之益

信過蒙督學滄溪公之采錄管蒯不遺幸荷代巡古松公之允俞風聲用樹遂使宅里流光足廣皇恩之曠蕩彝倫攸叙庶徵久道之化成所慚涼德莫遂顯揚惟有感激匪可言謝後下情無任忻戴感激之至謹疏

月川夏夫子誄辭

昔豕息師月川夏夫子學憲于閩槐巨總角
負墻齒心問道辱擢之譽髦遂奮觀光方吾
師望之殷也乃春官屢躓迨槐策名天階甫
三載而哲人告萎矣徒靡朝陰庸報風知石
矯中五譽介幼藐彼要津自範驅馳罔
敢渝前聞惟是積薄感淺機閣用窒卒無所
建明寔漸不類茲仰止名山徘徊故墟慨玄
乾鯨邁光靈倏幽國隕貞幹野讞師貨覽茲

遺編采諸宿獻緬思服義忉怛緘誠追而誅
之其辭曰

於昭師宗肇于玄珪光彼有唐喬闕攸躋奕
麗德載昌冰溪芾條縣泚沙川之涯墳典起家
再薦用賓醴陵廬江憲、宜民譽命未隆寔篤
後人吾師始降際彼喫醇岐嶷穎質晝靄騰芬
俛默黃虞厲翼青雲善推指故遂卓前聞搜秘
納靈揚翹茲藻六稔脩鱗閱綜探討射策彤墀
氣薄蒼昊初試吞封海陬懷保復隍慮功與墉

俱崇載道頌聲爰激四聰弓乘旣招宵人有訂
自擇浮湛式拜南宮昔在

世宗中興煌哲明堂配天廟制爰揭揆道據經
微言辯晰入告外順爰代喉舌六符色齊四郊
有繫帝嘉卿士方諸夷契孰是寅衷錫賚有列
旣結主知復媿相業稍夷而防禁近可躡顧豕
周行無敢反側素梓迭興秉鈞罔極波靡大江
孰介而植堂皇維師謹規正色豈不敷疎義敢
不力余寧有孚何虞見寧如彼媿媿三階可茂

區：迤紆胡忍磨涅用茲南顧出秉學臬八閩
承風度士仰鏡排黜浮夸直指心性童髻何知
蚤蒙鑑評言顛械撲庶紹斯棟直道云閱止棘
璫瑜左詰戎方折衝浙隅旁觀稱絀或曰隆污
師夙兼資一視皇塗安攘有截奏功斯膚覩彼
嶮微旋祝其車獨觀元化八載端君式思孔惠
喚彼溺沮蓬索可駕與時卷舒哆侈箕傲飄飄
鳳舉懷玉有銜沙川有野率止良明長裾楚、
嘯歌斷、言抽其緒甘泉尋源陽明互訂遵朱

軼陸衍翊千聖飛辯歸默撤樊夷徑齊心洵穆
超解上乘彼美念菴廉剝寡諧孤舟適永雨雪
盈堦豈伊同藉薰葭之懷珥立嚶鳴襟期靡乖
道貴師心辭取達指昭代典章挾諸大紀二相
誰毗覆用焉圯狸搢胡功鷄鳴不已雉離爰罹
狼跋鴛几薰蕕同器以矣遺戾不能毀方或云
亢厲高覽涉世奚疑屢蹶天乎人耶出處之際
嬰也無尤矧彼臧隸融昌恬愉曾無蒯蒿允矣
夫子國棟邦基雖蓄崇階良樹羽儀思彼抑鬱

方屆髦頤嗒、彼蒼避不憇遺釣槃難謀挾軌
靡推胡然錫極第祿弗綏從、舊嶽泥、清潁
鬱、精暉涕矚愴心名區之誌鬻田刊林戾天
鳴鳶鴛鷺俱暗九原不作銷靈埋憂疇昔之感
三紀如流義命大閑無敢墜羞文衡再竿六貞
厥守彼力撼山載羅其咎悠、虛生何用不朽
衣鉢無先寤辟孔傷遲、行道依、宮墻猶子
令孫世德不忘文未墜地附著斯章亂曰
邈潢閔湮宗道盟兮芟蕪啓鍵明德馨兮依光

攀麟美鳴珩兮秩宗視草颺言賡兮赫、其朋
豕硜、兮營秉類跡掩厥貞兮浮雲靄隸敵上
征兮糾纏推移寧靡櫻兮太音不墮奏鏘鏗兮
履尾不啞告終今兮駕塵駮虬馭蓬瀛兮蒼蒿
陟降儼若矚兮青雲昔附難齊衡兮玄扃已闕
鐸希聲兮三復遺文攬精菁兮綴詞闡幽悃豕
情兮

萬曆庚辰夏五月望後五日

賜進士第朝列大夫廣東布政司左叅議前戶

部員外郎會試同考試官晉江門生蔡一槐景明

甫頓首拜書

計已

對命卷之三

對命卷之三

對命卷之三

對命卷之三

對命卷之三

對命卷之三

跋月川先生類草

月川先生官祠部時嘗輯嘉靖祀

典考自

郊

廟其社稷百先師先農先蠶以

及金海神祠皆

世宗皇帝之所裁定者也中間建議

集議覆議之巔末纖悉具載聯為

三巨帙間出以見示且曰此帙中

余有有多少苦心處生請以歸卒業
焉深嘆先生考禮之精詳而不惑
世於聚訟之說持論之正大而不怵
於利害之私使古來禮官皆先生
其人安有魯僖之逆祀原廟之月
遊哉時欲抄取一通簡袞浩繁弗
及也袁賊肆亂燬及先生之廬巨
帙遂為煨燼私心常痛惜之幸疏
義奏議猶存刻於類草中留齋趙



